

Ya Mangêd ya Habi tungkol kan Apo Jesu-Cristo ya inhulat ni apostol Juan

Paunan habi

Ya Mangêd ya Habi tungkol kan Apo Jesu-Cristo ya inhulat ni apostol Juan, ay inhulat ta êmên ya balang makamwang hên laman hên habaytsi ya hulat, ay maniwala kan Apo Jesu-Cristo, ya impan-gakon Mámiligtas, ya Anak ni Apo Namalyari. Ha êmbayro ay magkamain hilan biyay ya ayn angga (Juan 20:31).

Ya pamaêg ni apostol Juan kan Apo Jesu-Cristo di ha unan hulat na ay ‘ya Habi.’ Impamwang ni apostol Juan ya Hi Apo Jesu-Cristo ay habaytoy ‘Habi’ ya kalamo ni Apo Namalyari paubat hên una. Impamwang na êt di ha hulat na, ya pito kanlan kapapaêpapah ya dinyag ni Apo Jesu-Cristo ya ampamaptêg ya hiyay habaytoy impangakon Mámiligtas, ya Anak ni Apo Namalyari.

Nakahulat ha kapitolo 13 angga ha 17 ya tungkol ha mangêd ya pamakilamo ni Apo Jesu-Cristo ha tagahonol na hên haton yabi bayo ya dinakêp. Ya yabin habayto ay disperas hên pagkapako na ha koros, kabay pinataniêh nay nakêm lan tagahonol na, ta êmên hila nakal-an ha balang malyari. Ha kapitolo 18 angga ha kapitolo 21 ay impamwang no ay-êmên yan dinakêp, haka ya tungkol ha pagkapako na ha koros. Impamwang

êt bayro ya pangabiyay nan oman, haka ya pag-pahlêk na ha tagahonol na, nayari yan nabiyay oman.

Bayri êt ha inhulat ni apostol Juan, ay impamwang ya an-idigalo ni Apo Jesu-Cristo, ay biyay ya ayn angga kanlan ampaniwala ya hiyay dann, kaptêgan, haka biyay (Juan 14:6).

Kabooan hên pinakalaman

Umpisan hulat 1:1-18

Hi Juan Bautista haka ya tagahonol ni Apo Jesu-Cristo 1:19-51

Ya pamanoro ni Apo Jesu-Cristo 2:1-12:50

Hi Apo Jesu-Cristo ha balayan Jerusalem 13:1-19:42

Hi Apo Jesu-Cristo ay nabiyay oman 20:1-31

Minghan ya êt nagpahlêk ha probinsyan Galilea 21:1-25

Ya Habi ya ayn kaatag no alwan hi Apo Jesu-Cristo

¹ Hêñ haton kauna-unaan hêñ a pon dinyag ya hata langit, haka luta ay main nanan Habi. Habaytoy Habi ay atsi bayro hêñ kalamo ni Apo Namalyari, haka hiyay Apo Namalyari. ² Hiyay kalamo ni Apo Namalyari paubat hêñ una. ³ Hiyay nanyag hêñ kaganawan ya atsi bayri. Ayn hinon nadyag no alwan gawan kana. ⁴ Hiyay ubatan hêñ biyay haka hiyay maialimbawa ha atâng ya ampamahawang ha ihip hêñ balang miha. ⁵ Habaytoy hawang ay anhumawang ha luta ya nanad dinumiglêm gawan ha kasalanan. A ya napahambut ha kariglêman.

6 Amêhêñ, main lalaki ya in-utoh ni Apo Namalyari, ya nag langan Juan.* **7** In-utoh na ya hêñ mamipamwang hêñ tungkol ha hawang, ta êmêñ ya balang miha ay maniwala kanan habayto ya ampamahawang hêñ kaihipan. **8** Alwan hi Juan ya hawang, noa, hiyay in-utoh hêñ mamipamwang hêñ tungkol ha hawang. **9** Ya pêtêg ya hawang, ay habaytoy nilumatêng di ha luta ya ampamahawang ha kaihipan hêñ balang miha.

10 Hiyay nanyag hêñ hata luta hêñ hato pon, haka hiyay nilumatêng di ha luta. Noa, a la ya awud nabalayan. **11** Agyan hilay Israelita ya kamag-anak na, ay a nananggap kana hêñ nilumatêng ya kanla. **12** Noa, hilangan ya nananggap kana, haka naniwala kana, ay dinyanan nan tungkulan hêñ mag-in anak ni Apo Namalyari. **13** Ya pangianak kanlan anak ni Apo Namalyari, ay alwan nanad pangianak tawo, haka alwan gawan ha kalabayan lan miahawa hêñ magkamain anak, noa, gawan ha kapangyarihan ni Apo Namalyari.

Ya Habi ya ayn kaatag no alwan hi Apo Jesu-Cristo, ay nag-in tawo

14 Ya Habi ay nag-in tawo, haka napaidi di ha luta. Ya hinabi na ay panay pêtêg haka hiya ay panay maingaloën. Nahêlêk naén ya panga-Diyos na. Yabay ya panga-Diyos hêñ kamiha-mihaan Anak ni Apo Namalyari, ya Tatang na.

* **1:6** Hi Juan ya namabawtismo kanlan nangamin kasalanan la. Ambanhagan la yan Juan Bautista. Alwan hiya ya nanulat hêñ hata inhulat bayri.

¹⁵ Nangaral hi Juan Bautista hēn tungkol kanan hata Habi ya nag-in tawo. Habaytsi ya pamipamwang na, hēn intoro na hi Apo Jesus, ya wana, “Yabay ya hinabi ko kamoyu ya ‘main lumatēng ya makapangyarihan kangko, gawan atsi yay na, hēn a ko pon in-anak.’ ”

¹⁶ Kaganawan tamo ay ampakinabang ha kahampatan nakêm ni Apo Jesu-Cristo, ya hadyay maingaloén. ¹⁷ Ya Kautuhan ni Apo Namalyari, ay impamwang ni apo Moises kanlan Israelita, noa, ya kaptēgan, haka ya ingalo ni Apo Namalyari, ay impamwang ni Apo Jesu-Cristo. ¹⁸ Paubat hēn haton lagi, ay ayn êt nakahêlêk kan Apo Namalyari, no alwan bêngat hi Apo Jesu-Cristo ya kamihamihaan nan Anak. Hiyay Apo Namalyari, haka hiyay panay nan kalamo. Hiya ya namipamwang kan Apo Namalyari, ya Tatang na.

Ya panoro ni Juan Bautista

(Mateo 3:1-12; Marcos 1:1-8; Lucas 3:1-18)

¹⁹ Amêhêñ, hilay Israelita, ya ampamaala ha balayan Jerusalem, ay namiutoh hēn ungro kanlan pari la, haka ungro kanlan Levita ya ampanawop kanlan pari, ta êmēn hila mangotâng kan Juan Bautista no hino ya. ²⁰ Hinabi ni Juan ya kaptēgan, ya wana, “Alwan hikoy Mesias, ya Cristo, ya pinili ni Apo Namalyari hēn mag-in habaytoy Mámilitgas ya impangako na.” ²¹ “No êmbayro, hino ka awud?” wanla. “Kayno hika hi Propeta Elias!” “Alwa.” wani Juan. “Kayno hika ya Propeta ni Apo Namalyari, ya an-êngganan naêñ!” “Alwa.” wanan oman ni Juan. ²² Wanlay na êt, “Habiêñ mo awud no hino ka, ta êmēn naêñ maipamwang kanlan

namiutoh kannaêñ. Hinoy mahabi mo ya tungkol ha sarili mo?” ²³ Amêhêñ, hinabi ni Juan, “Hiko ya inungkat ni Propeta Isaias, ya wana,
 ‘Main ampan-angaw ha legal ya kabalah-balahan,
 ya wana kanlan kal-atan ya naka-tsipon,
 “Il-an yoy nakêm yo ha pamanlumatêng hêñ
 Panginoon,
 Ya nanad ha pamil-an hêñ dann ha
 pamanlumatêng hêñ mihay matag-ay ya
 manungkuluan.”’†
 Habaytoy hinabi ni Propeta Isaias ya tungkol kangko.”

²⁴ Hilay nangotang, ay in-utoh lan Pariseo.‡
²⁵ Nangotang hilay na êt kan Juan, ya wanla, “Awta ampamawtismo ka? Alwan hika awud ya Mesias, ya Cristo, ya impangakon Mámiligtas ya pinili ni Apo Namalyari hêñ mamaala. Alwa ka etaman hi Propeta Elias. Haka alwan hika ya Propeta ni Apo Namalyari ya an-êngganan naêñ.”
²⁶ Kabay hinabi ni Juan, ya wana, “Lanêñ ya ampangibawtismoan ko, noa, main di hêñ kalamo yo, ya a yo kilala. ²⁷ Agyan nuna kon nilumatêng kana, ay mangokal man hêñ hêêl pag-apin bitsih na, ay ayn akon karapatan ta matag-ay ya tungkuluan na.” ²⁸ Habayto ay nalyari ha baryon Betania, ha lipay hêñ Ilog Jordan. Yabay ya ilog ya pinamawtismoan ni Juan.

*Hi Apo Jesus ay Biseron Tupa ni Apo Namalyari
 ta idin nay lawini na ha ikakangêd tamo*

† ^{1:23} Isaias 40:3. ‡ ^{1:24} Hilay Pariseo ay mihay pangkat lan Israelita. Ampag-aranan lay Kautuhan ni apo Moises haka êndat la no anhonolêñ la ya balang utoh bayro.

²⁹ Hêñ humonoy allo, ay nahêlêk ni Juan hi Apo Jesus ya andumani kana. Kabay wana kanlan kalamo na, “Hêlkên yo! Atsi di ya Biseron TupaÑ ni Apo Namalyari. Hiya ya ayn kasalanan, ya mamialih kasalanan lan tawo di ha luta. ³⁰ Yabay ya hinabi ko kamoyu ya ‘main lumatêng ya makapangyarihan kangko, gawan atsi yay na, hêñ a ko pon in-anak.’ ³¹ Agyan hiko, ay a ko ya muwang no hino yan taganá hêñ hato. Êmbayro man, ay atsi ko di, hêñ ampamawtismo ta êmêñ ya ipamwang ha Israelita.”

³² Habaytsi ya pamipamwang ni Juan Bautista, “Nahêlêk ko ya Espiritu ni Apo Namalyari ya inumaypan ubat ha langit, hêñ nanad ha mihay patipati, haka nagmana ya kana. ³³ Hiko man, hêñ una, ay a ko muwang no hino yan taganá. Noa, hi Apo Namalyari, ya namiutoh kangko hêñ mamawtismo ha lanêm, ya naghabikangko, hêñ êmêñ di, ‘Mahêlêk mo ya Espiritu ko ya umaypa haka magmana ha mihay lalaki. Hiyay mamawtismo ha pamahapat hêñ Espiritu ko.’ ³⁴ Nahêlêk ko ngan ya nalyari, kabay an-ipamwang ko ya hiya ya Anak ni Apo Namalyari.”

Hilay unan tagahonol ni Apo Jesus

³⁵ Ha humonol ya allo, ay atsi yay na êt ha lanêm hi Juan Bautista haka ya lowa kanlan tagahonol na. ³⁶ Hêñ naikit na ya ampita bayro hi Apo Jesus, ay wana, “Hêlkên yo! Hiyay Biseron Tupa ni Apo Namalyari. Hiya ya halanggo tamo.” ³⁷ Nagilam lan loway tagahonol ni Juan ya hinabi na, kabay

§ 1:29 Genesis 22:8 An-iátang lan Israelita hêñ biseron tupa, ta êmêñ mapatawad ya kasalanan la.

hinumonol hila kan Apo Jesus. ³⁸ Hêñ namal ingay hi Apo Jesus ay nahêlêk na hilay anhumonol kana haka na hila kinotang, ya wana, “Main kaw hêñ labay?” Kabay hinabi la, “Rabi, antoy am paidyanan mo?” (Ya labay habiêñ hêñ Rabi ay Mánoro.) ³⁹ Wani Apo Jesus kanla, “Kihonol kaw kangko, ta hêlkêñ yo.” Mag-aalas quattro hêñ maapon hêñ habayto. Nakihonol hila kana ta hinlêk lay ampaidyanan na. Nagdahêl hila tana kana.

⁴⁰ Ya miha kanlan lowa, ya nakagilam hêñ habi ni Juan Bautista, haka nakihonol kan Apo Jesus, ay hi Andres, ya kapotoh pohêl ni Simon Pedro. ⁴¹ Habayto hi Andres, ay una nan tinapol hi Simon, ya kapotoh pohêl na, ta wana kana, “Natapol naêñ ya Mesias, ya pinili ni Apo Namalyari hêñ mag-in Mámilitgas!” (Ya labay habiêñ hêñ Mesias ha habin Griego ay Cristo.) ⁴² Pinakilamo ni Andres hi Simon kan Apo Jesus. Hinlêk ni Apo Jesus hi Pedro, bayo wana, “Hika hi Simon, ya anak ni Juan. Banhagan la kan Cefas.” (Ya labay habiêñ hêñ Cefas ay bato. Habayto ay Pedro ha habin Griego.)

Ya hinabi ni Apo Jesus kan Felipe haka Natanael

⁴³ Ha humonoy allo, ay naihipan ni Apo Jesus hêñ maniraw ha probinsyan Galilea. Natapol na hi Felipe, haka wana kana, “Kihonol ka kangko.” ⁴⁴ Hi Felipe ay taga-Betsaida ya balayan lan Andres haka Pedro. ⁴⁵ Tinapol ni Felipe hi Natanael, bayo wana kana, “Natapol naêñ ya Mesias, ya Cristo, ya impangakon Mámilitgas ya pinili ni Apo

Namalyari hēn mamaala, ya inungkat ni apo Moses ha Kahulatan ya impahulat kana ni Apo Namalyari. Hiya ya inungkat etaman ha inhulat lan kaatag ya mámipamwang ni Apo Namalyari. Hiya hi Jesus, ya taga-Nazaret, ya anak ni Jose.” **46** Amêhén, wani Natanael kan Felipe, “Yarin main mangêd ya ubat ha balayan Nazaret, ya pêpérad ya tawo?” Kabay wani Felipe kana, “Kihonol ka kangko ta hêlkên mo.”

47 Hêñ nahêlêk ni Apo Jesus ya andumani kana hi Natanael, ay wana, “Hêlkên yo! Atsi di ya mihay pêtêg ya Israelita ya a ampanloko.” **48** Kabay wani Natanael, “Ay-êmén mon namwangan ya laman nakêm ko?” Amêhén, wani Apo Jesus, “Bayo ka binaêg ni Felipe ay nahêlêk kata ha hilong hêñ poon igos.” **49** Kabay wani Natanael, “Mánoro,* hika ya Anak ni Apo Namalyari! Hika ya Poon hêñ bansan Israel.” **50** Wani Apo Jesus kan Natanael, “Ampaniwala ka kangko gawan nahêlêk kata ha hilong hêñ poon igos. Igit pon di ya kapapaêpapah ya mahêlêk mo.” **51** Wani Apo Jesus kanla, “Pak-agilamén yo, lumatêng ya allo, ay mahêlêk yoy nakaloat ya langit, haka hilay anghel ni Apo Namalyari ya lumakat haka lumohan bayro, hêñ palako kangko, ya Taga-Langit, ya In-anak Tawo.”

2

Ya kasálan ha balayan Cana

1 Hêñ nalabah ya loway allo, main kasálan ha balayan Cana ha probinsyan Galilea. Atsi bayro

* **1:49** Rabi ha habi lan Israelita.

ya indo ni Apo Jesus. ² Hi Apo Jesus, haka hilay tagahonol na, ay hinagyat ha kasálan etaman. ³ Hêñ naubuh ya alak ha kasálan, ay hinabi nan indo ni Apo Jesus kana, ya wana, “Naubuh ya alak la. Manawop ka dayi.” ⁴ Kabay hinabi ni Apo Jesus ha indo na, “Paulayan mo ko, Indo. Alwa ko pon oras, hêñ manyag hêñ kapapaêpapah.” ⁵ Embayro man, ay hinabi nan indo ni Apo Jesus kanlan ampanawop ha kasálan, “Daygên yo ya hinon habiêñ na kamoyu.”

⁶ Amêhêñ, main bayro hêñ anêm ya panyanan lanêm ya nadyag ha bato, ya panggamitêñ lan Israelita no honolêñ lay paniwala la hêñ tungkol ha pamaglinis hêñ lawini la. Hata panyanan ay ampaglaman hêñ lowampo angga ha tatlumpo ya galon ya balang miha. ⁷ Wani Apo Jesus kanlan ampamiapag ha kasálan, “Pun-êñ yon lanêm ya hata anêm ya panyanan.” Kabay pinno lan lanêm, hêñ angga ha bêbêy. ⁸ Bayo wana kanla, “Manakhob kaw ta gêtan yo kanan ampamaala kanlan ampanawop ha kasálan.” Kabay nanakhob hila, haka la gintan kanan ampamaala. ⁹ Tinawayan nan ampamaala ya lanêm, ya nadyag ni Apo Jesus hêñ alak, noa, a na muwang no antoy ubatan hêñ habaytoy alak, ta hilay nangahoy bêngat, ya nag muwang hêñ habayto. Kabay binaëg nay lalaki ya an-ikasal. ¹⁰ Ta hinabi na kanan lalaki, “Hilay kaatag ay ampamiawah pon hêñ naayang ya alak. Bayo, no mal-at ya nainêm lan makikasal, ay mamiawah hila bayto hêñ ayn makayn ayang. Noa, hika, ay babayo mon in-awah ya naayang.”

¹¹ Habayto ya nalyari ha balayan Cana, ha

probinsyan Galilea, ay unan kapapaêpapah ya dinyag ni Apo Jesus. Hêñ dinyag nay habayto, ay impamwang nay panga-Diyos na. Haka naniwala hilay tagahonol na, ya hiyay Cristo.

¹² Nahêñ nayari ya kasálan, ay nilumohan hilan Apo Jesus ha balayan Capernaum. Nakihonol kana ya indo na, hilay ali na, haka hilay tagahonol na. Nagdahêl hila bayro hêñ ungnoy yabi.

Namitaboy hi Apo Jesus hêñ ampipagtinda ha Templo
 (*Mateo 21:12-17; Marcos 11:15-19; Lucas 19:45-48*)

¹³ Kaban atsi hilan Apo Jesus ha balayan Capernaum, ay marani yanay Pistan Pangaligtas ha Egípto.* Kabay nilumakat hi Apo Jesus haka hilay tagahonol na ha balayan Jerusalem ta makipista.

¹⁴ Hêñ nilumatêng hilay na ha ilwangan hêñ Templo ay nahêlêk na hilay mâmihaliw hêñ baka, tupa, haka pati-pati ya iátang kan Apo Namalyari. Atsi êt bayro hilay mâmihagili hêñ pera. ¹⁵ Nanuluk ya hi Apo Jesus. Nanyag yan pangumpah kanla, ta intaboy-taboy na hilangan, anggan tupa, haka baka ha plasa hêñ Templo. Intapon nay pera lan mâmihagilin pera haka na in-iitwag ya lamisaan la.

¹⁶ Hinabi na kanlan mâmihaliw hêñ pati-pati, ya wana, “Alihêñ yo ya pati-pati di. Paan yon daygêñ palengke ya bali ni Apo Namalyari, ya Tatang ko.”

¹⁷ Naihipan lan tagahonol na, ya nakahulat† ha habi ni Apo Namalyari, ya tungkol kanan Mesias,

* **2:13** Paskwa. Hêlkêñ ha panlêkan labay habiêñ hêñ habi di ha bokotan hêñ hata Bibliya. † **2:17** Awit 69:9.

ya Cristo, ya wanana hulat, “Ikamatsi ko ya hadyay pamanlugud ko ha bali mo.”

¹⁸ Kabay hinabi lan taga-Israël ya ampamaala ha Templo kan Apo Jesus, ya wanla, “Hinoy maipahlék mo kannaén, ya kapapaêpapah, ta êmén naén mamwangan, ya main kan tungkulan hèn manyag hèn dinyag mo?” ¹⁹ Amêhén, wani Apo Jesus, “Hiraén yoy hata Templo, ta ipairêng kon oman ha tatloy allo.” ²⁰ Kabay wanlan Israelita, “Apatapo boy anêm ya taon ya panyag hèn hata Templo. Yarin maipairêng mo ya ha tatloy allon bêngat.”

²¹ Noa, ya Templo ya inungkat ni Apo Jesus, ay yabay ya lawini na. ²² Kabay hèn nabiyyay yan oman hi Apo Jesus ha ikatlon allo hèn ubat yan natsi, ay naihipan lan tagahonol na, ya hinabi nay habayto. Pinaniwal-an lay Kahulatan ya impahulat ni Apo Namalyari, haka ya hinabi ni Apo Jesus ya tungkol ha pangabiyay nan oman.

Muwang ni Apo Jesus ya laman hèn kaihipan

²³ Kaban atsi ya hi Apo Jesus ha balayan Jerusalem, ha Pistan Pangaligtas, ay mal-at ya naniwala, ya hiyay Cristo, ya pan-êngganan la. Naniwala hila, gawan ha kapapaêpapah ya dinyag na. ²⁴ Embayro man, ay ayn yan tsiwala kanla hi Apo Jesus, ta muwang nay laman ihip hèn balang miha. ²⁵ Ahina kailangan ipamwang kana, ya tungkol ha ugali hèn hinoman, gawan mana nay nan muwang ya laman ihip hèn balang miha.

3

Hi Apo Jesus haka hi Nicodemo

¹ Bayro ha balayan Jerusalem, ay main mihay Pariseo, ya nag langan Nicodemo. Hiyay miha kanlan ampamaala ha Israelita. ² Mihay yabi, ay dinumani ya kan Apo Jesus, ta wana kana, “Mánoro, muwang naén ya in-utoh ka ni Apo Namalyari, hén manoro kannaén, ta a mo madyag ya andaygén moy kapapaêpapah, no ayn ya kamo hi Apo Namalyari, hén ampanawop kamo.”

³ Kabay wani Apo Jesus kana, “Pakagilamén mo, hilay a in-anak oman, ay a makapakilamo ha pamanlokop ni Apo Namalyari.”

⁴ “Apo, ay-êmén hilan ma-ianak oman no toa hilay na? Makahowén hilan oman ha bitokan indo la?”

⁵ Kabay wani Apo Jesus kana, “Pakagilamén mo. Ayn makapakilamo ha pamanlokop ni Apo Namalyari, no a ya pon na-ianak ha lanêm, haka ha Espiritu ni Apo Namalyari ta êmén mabayo ya nakém na. ⁶ Hilay tawo ay ampamianak hén tawo ya main biyay bayri ha luta. Hilay in-anak ha Espiritu ni Apo Namalyari, ay main bayoy biyay ha hawop nan Espiritu na. ⁷ Paan kan mag-êpapah ha hinabi ko kamo, ya ‘Hikaw ay kailangan ianak oman.’ ⁸ Ya Espiritu ni Apo Namalyari ay nanad hén angin, ya a maiutoh. Angkagilam ya tonoy hén angin. Noa, a mamwangan no antoy ubatan na, haka no antoy lakwén na. Êmbayro êt, ay a mahélék no ay-êmén nan bayoén nan Espiritu ni Apo Namalyari ya nakém, noa, habaytoy mahélék ha biyay.”

⁹ Améhén, wani Nicodemo, “Apo, ay-êmén mangyari ya habain ya hinabi mo?”

10 Kabay hinabi ni Apo Jesus kana, “Miha ka ya mánoro di ha Israel. Yarin a mo angkaintindi-han ya hatsi. **11** Pakagilamén mo. Panhabiên naêñ ya muwang naêñ, haka an-ipamwang naêñ ya nahélêk naêñ. Noa, a yo ampaniwal-an ya anhabiên naêñ. **12** No, a yo paniwal-an ya impamwang ko kamoyu, ya tungkol di ha luta, ay-êmén yon paniwal-an ya ipamwang ko kamoyu ya tungkol ha langit! **13** Ta hikon bêngat, ya Taga-Langit, ya In-anak Tawo, ya nag-aypa ubat ha langit, ay mag-orong ha langit.

14 “Haka no ay-êmén nan intag-ay ni apo Moses ya utan, ya nadyag ha tangso,* ha kabalah-balahan, ay êmbayro êt, ay kailangan itag-ay ako ha koros, hiko, ya Taga-Langit, ya In-anak Tawo. **15** Kailangan ya habayto, ta êmén hilay ampaniwala ya hikoy Cristo, ay madyanan biyay ya ayn angga.” Habaytoy hinabi ni Apo Jesus.

16 Gawan ha hadyay pamanlugud ni Apo Namalyari ha balang miha, ay in-utoh na ya kamiha-mihaan nan Anak ha luta, ta êmén hilay ampaniwala kana, ay a migtan ha impiyerno, noa, madyanan biyay ya ayn angga. **17** Ta a na in-utoh ni Apo Namalyari ya Anak na, ta êmén sintinsyah-han hêñ parusaan hilay tawo. Noa, in-utoh na ya ta êmén na hila iligtas ha parusa.

18 A hila parusaan hilay ampaniwala ha Anak. Noa, hilay a ampaniwala kana, ay sinintinsyahnan nanan parusaan, gawan a hila naniwala ha kamiha-mihaan Anak ni Apo Namalyari. **19** Sinintinsyahhan hilan parusaan, gawan agyan

* **3:14** Bilang 21:9.

nantan ya Anak na hēn kamwangan ya tungkol kan Apo Namalyari ya nanad hawang ha balang miha ha luta, ay labay la pon ya kariglēman, gawan nangarawak ya dyag la. ²⁰ Ta hilay ampanyag karawakan, ay angkahêmêkan lay hawang, haka a hila andumani ha hawang, ta êmên a mahawangan ya nangarawak ya dyag la. ²¹ Noa, hilay ampanyag kangêran, ay andumani ha hawang, ta êmên mahêlêk ya habaytoy andaygên la, ay kalabayan ni Apo Namalyari.

Hi Apo Jesus haka hi Juan Bautista

²² Amêhêñ, nilumohan hi Apo Jesus haka hilay tagahonol na ha dani hēn lanêm. Nagdahêl ya bayro ha probinsyan Judea hēn kalamo lan tagahonol na, haka namawtismo ya kanlan labay pabawtismo. ²³ Hi Juan Bautista ay namawtismo etaman ha logal ya nag langan Enon ha danin Salim, gawan mal-at ya lanêm bayro, haka mal-at ya ampagpabawtismo kana. ²⁴ A ya pon bayton impahukul hi Juan.

²⁵ Mihay allo, ay main mihay Israelita, ya naki-hubakan kanlan tagahonol ni Juan, ya tungkol ha pamaglinis lan Israelita, hēn pamanhumonol ha paniwala la. ²⁶ Amêhêñ, dinumani kan Juan ya tagahonol na, ta wanla, “Mánoro, habaytoy kalamo mo ha lipay hēn lanêm, ya impamwang mo ya hiyay Cristo, ay atsi bayri hēn ampa-mawtismo kanlan mabay pabawtismo. Haka mal-at ya andumani kana.” ²⁷ Kabay wani Juan, “Ya katungkulon na ay ubat kan Apo Namalyari, ta ayn hinoman ya main êmbayro ya katungkulon no a indin kana ni Apo Namalyari. ²⁸ Hikaw man,

ay muwang yoy na, ya hinabi ko, ya alwan hikoy Mesias, ya Cristo, ya impangakon Mámiligtas ya pinili ni Apo Namalyari hén mamaala. Ta hikoy in-utoh ni Apo Namalyari hén mamipamwang, hén lumatêng yay na. ²⁹ Nanad ha kaluguran hén mihay lalaki ya an-ikasal, ya ampamil-an kaganawan ha kasáalan. Hadyay higla na ha magilam nay habi nan lalaki ya an-ikasal. Êmbayro êt kangko. In-il-an koy pamanlumatêng nan Mesias, ya Cristo, haka hadyay higla ko ta nilumatêng yay na. ³⁰ Dapat mitag-ay ya, haka kailangan miaypa ya tungkulon ko.”

Hi Apo Jesus, ya taga-langit

³¹ Hi Apo Jesus, ya taga-langit, ay ayn kapantag. Noa, ya taga-luta, ay atsi di ha luta ya nakém na, haka ya anhabiên na ay tungkol di ha luta. Hi Apo Jesus ay daêg nay balang miha. ³² Haka anipamwang na ya nahélék na, haka ya nagilam na, êmbayro man, ay pêpérâd ya ampaniwala ha anhabiên na. ³³ Noa, hilay ampaniwala ha anhabiên na, ay ampamaptêg ya pêtêg ya habi ni Apo Namalyari. ³⁴ Ta hiyay in-utoh ni Apo Namalyari, hi Apo Jesus bay, ay ampamipamwang hén habi na. Haka ayn kulang ya pam-i ni Apo Namalyari hén Espiritu na kana. ³⁵ Anlugurên ni Apo Namalyari, ya Tatang tamo, ya Anak na, hi Apo Jesus. Haka impatalan na kana ya kaganawan ya atsi kana. ³⁶ Hilay ampaniwala kan Apo Jesus, ya Anak ni Apo Namalyari, ay main biyay ya ayn angga. Noa, hilay a mabay hén humonol kana, ay a madyanan habaytoy biyay, ta ya huluk ni Apo Namalyari ay atsi kanla, haka parusaan hila hén ayn angga.

4

Hi Apo Jesus haka ya mihay babayi ya tagaprobinsyan Samaria

¹ Amêhêñ, namwangan lan Pariseo* ya mal-at pon ya andumani kan Apo Jesus hên pabawtismo haka patoro kana, kanan hilay andumani kan Juan. Namwangan ni Apo Jesus ya muwang lan Pariseo ya habayto. ² Embayro man, ay alwan hi Apo Jesus ya ampamawtismo, noa, ya tagahonol na ya ampamawtismo. ³ Gawan namwangan ni Apo Jesus ya muwang lan Pariseo ya habayto, ay nag-alíh ya, haka hilay tagahonol na ha probinsyan Judea, ta nag-orong hila ha probinsyan Galilea. ⁴ Bayo hila miabot ha probinsyan Galilea, ay madanan la pon ya probinsyan Samaria.

⁵ Nilumatêng hila ha mihay balayan hên Samaria ya pinata-ngalanan Sicar, ya narani ha luta ya indin ni apo Jacob, ya miha kanlan ninuno lan Israelita, ha anak na, hi Jose hên haton lagi. ⁶ Atsi bayro ya libon ya kinali ni apo Jacob. Nikno ya hi Apo Jesus ha dani nan habaytoy libon, gawan pagal na ha pammita. Maranin ugto hên habayto.

⁷⁻⁸ Kabay nagtagloh hilay tagahonol na ha balayan hên nanaliw hên kaén. Kaban ampikno ya bayro hi Apo Jesus, ay main nilumatêng ya mihay babayi, ya taga-Samaria ta mangahoy. Amêhêñ, wani Apo Jesus kana, “Kiinêm ako raw.”

* **4:1** Hilay Pariseo ay mihay pangkat lan Israelita. Èndat la no anhonolên la ya balang utoh ya ubat kan Apo Namalyari.

⁹ Amêhêñ, wanāñ babayi kana, ya wana, “Awo, noa, hika ay mihay ampagsimba ha Templo ha balayan Jerusalem, awta ampakikwa kan lanêm kangko, ya mihay taga-Samaria?” Hinabi nay habayto ta bawal kanlan Israelita ya ampagsimba ha Templo ha Jerusalem, hêñ manggamit hêñ gamit lan taga-Samaria.

¹⁰ Kabay wani Apo Jesus kana, “No muwang mo dayi ya pan-idin ni Apo Namalyari, haka no hino ko, ya ampakikwan lanêm kamô, ay nakikwa ka dayi kangko, ta dinyanan kata dayi hêñ lanêm, ya ampam-in biyay.”

¹¹ Kabay wanāñ babayi, “Apo, ayn kan panakhub, haka malalê ya hata libon. Antoy pangwanan mon habaytoy lanêm ya ampam-in biyay? ¹² Yarin daëg mo hi Jacob ya unan toa tamo, ya nangali hêñ hata libon, haka ninêm di hêñ kalamo nay maának na haka ayop na!”

¹³ Amêhêñ, wani Apo Jesus, “Hilay ampinêm hêñ hata lanêm ay maangan oman. ¹⁴ Noa, hilay ampinêm hêñ lanêm ya an-idin ko, ay ahinan maangan oman, ta ya lanêm ya an-idin ko, ay mag-in nanad sibol ha nakêm la, ya mam-in biyay ya ayn angga.”

¹⁵ Amêhêñ, wanāñ babayi kana, “Apo, dyanan mo kon habaytoy lanêm, ta êmên a kina maangan oman, haka a kina kailangan mangahoy di.”

¹⁶ Amêhêñ, wani Apo Jesus kana, “Lakwêñ moy ahawa mo, ta gêtan mo ya di.”

¹⁷ Noa, wanāñ babayi, “Ayn akon ahawa, Apo.”

Nahêñ nahabi nay habayto, wani Apo Jesus, “Awo, pêtêg ya hinabi mo, ya ayn kan ahawa. ¹⁸ Ta

limay nay nag-in ahawa mo, haka ya lalaki, ya ampaglamo mo amêhêñ, ay alwa mon ahawa.”

¹⁹ Bayo, wanán babayi kana, “Apo, angkaintindihan kina ya hika, ay mihay propeta ni Apo Namalyari. ²⁰ Hilay unan toa tamo, ay nagsimba di ha tawtgug hêñ Samaria. Noa, panhabiêñ yo, ya kailangan magsimba ha Templo ha Jerusalem.”

²¹ Kabay wani Apo Jesus kana, “Maniwala ka ha anhabiêñ ko, ya lumatêng ya allo, ay alwan bayri, o ha Templo ha Jerusalem ya pagsimbaan kan Apo Namalyari, ya Tatang tamo. ²² Hikaw ya taga-Samaria, ay a yo kilala ya ansimbaêñ yo. Noa, hikay, ay kilala naêñ ya ansimbaêñ naêñ, ta ya kamwangan, ya tungkol ha kaligtasan, ay ampangubat kannaêñ, ya ampagsimba ha Jerusalem. ²³ Amêhêñ ya panaon ya hilay pêtêg hêñ ampagsimba kan Apo Namalyari, ya Tatang tamo, ay magsimba kana hêñ booy nakêm ha hawop hêñ Espiritu na. Ta êmbayroy pamagsimba ya antapolêñ na. ²⁴ Hiyay Espiritu. Kabay hilay ampagsimba kana ay kailangan hêñ magsimba kanan pêtêg ha hawop hêñ Espiritu na.”

²⁵ Amêhêñ, wanán babayi, “Muwang ko ya lumatêng ya Mesias, ya ambaêgêñ lan Cristo. Pan-lumatêng na di, ay ipamulah na kantamo ya balang hino.” ²⁶ Kabay wani Apo Jesus, “Hiko, ya kahabi mo ay habaytoy Cristo.”

²⁷ Kaban ampaghabi ya, ay anlumatêng hilay tagahonol na. Nag-êpapah hila, ta main yan kahabi ya babayi. Noa, ayn nangotang kana no hinoy

labay na kanan babayi o no awta ampakihabi ya kana.

²⁸ Imbalag nan babayi ya banga na, haka ya nag-orong ha balayan, ta hinabi na kanlan kal-atan, ya wana, ²⁹ “Kihonol kaw kangko ta hêlkên yoy mihay lalaki, ya namihabi kangko ngan hên dinyag ko. Kayno hiyay Mesias.” ³⁰ Kabay nakihonol hila kana ta hêlkên la hi Apo Jesus.

³¹ Kaban ayn ya bayro ya babayi, ay anhagyatêñ yan tagahonol na hi Apo Jesus, ya mangan ya dayi. ³² Noa, wana kanla, “Main akon maêkan ya a yo muwang.” ³³ Kabay nihahabi hilay tagahonol na, “Kayno main nam-in kaêñ kana.” ³⁴ Hinabi ni Apo Jesus kanla, ya wana, “Ya pamanyag kalabayan hên nangiutoh kangko, haka yariêñ ya impadyag na kangko, ay yabay ya nanad kaêñ ko.”

³⁵ “Anhabiêñ yo ya, ‘Apat a buwan pon bayo panggapah.’ Noa, anhabiêñ ko kamoyu, ya pakahêlkên yo hilay mabay hên manggilam habi ko. Nanad hilan pali ya nawto ya magapah. ³⁶ Hilay ampanggapah ay ampananggap hên upa la. Hilay ampakahagyat hên tawo hên maniwala kangko, ay nanad kanlan ampanggapah, ta ampanipon hilan tagêy ya para ha biyay ya ayn angga, ta êmêñ hilay nanghad, haka hilay nanggapah ay maghigla. ³⁷ Bayrin angka-pêtêg ya kahabian, ya wana, ‘Mihay ampanghad haka mihay na êt ya ampanggapah.’ ³⁸ In-utoh kataw hên gapahêñ ya a yo pinaghayngêtan. Kaatag ya namipamwang hên habi ko, haka hikaw ya nakinabang.” Habaytoy hinabi ni Apo Jesus kanlan tagahonol na.

³⁹ Mal-at kanlan taga-Samaria ha balayan Sicar ya naniwala, ya hi Apo Jesus, ay hiyay Cristo,

gawan ha habi nan babayi, ya wana, “In-ubuh nan hinabi kangko ya dinyag ko.” ⁴⁰ Kabay hēn nilumatēng hilay taga-Samaria kanlan Apo Jesus, ay hinagyat la hilan Apo Jesus hēn magdahēl kanla. Nagdahēl hila kanla hēn loway yabi.

⁴¹ Nanoro hi Apo Jesus haka mal-at êt ya kaatag kanlan taga-Samaria ay naniwala ya hiyay Cristo, gawan ha toro na. ⁴² Hinabi la kanan babayi, “Ampaniwala kay alwan bēngat gawan ha hinabi mo, noa, gawan nagilam naêñ ya hinabi na, haka muwang naêñ taganá ya hiyay Cristo, ya impan-gakon Mámiligtas ya in-utoh ni Apo Namalyari ha tawo ha luta.”

Namaalih hi Apo Jesus hēn hakit hēn anak hēn mihay main tungkulan

⁴³ Nahêñ nalabah ya loway yabi, ay nammita hilan Apo Jesus hēn palakon probinsyan Galilea.

⁴⁴ Wani Apo Jesus hēn hato pon, ya mihay propeta ni Apo Namalyari, ay a an-igalang ha sarili nan logal. ⁴⁵ Noa, hēn nilumatēng hila bayro, ay mahigla hilan tinanggap hēn taga-probinsyan Galilea, gawan nahêlêk la ya dyag ni Apo Jesus, hēn nakipista ya ha Pistan Pangaligtas ha Egipto[†] ha balayan Jerusalem.

⁴⁶ Amêhêñ, nag-orong hilan Apo Jesus ha balayan Cana, ha probinsyan Galilea, ya pinanya-gan nan alak ya lanêm. Main bayro hēn mihay main tungkulan ha balayan Capernaum, ya main anak ya lalaki ya ampaghakit. ⁴⁷ Hēn nagilam na, ya nilumatēng hi Apo Jesus ha probinsyan

† **4:45** Paskwa. Hêlkêñ ha panlêkan labay habiêñ hēn habi di ha bokotan hēn hata Bibliya.

Galilea hēn ubat ha probinsyan Judea, ay nilako na ya, ta nakihabi ya kan Apo Jesus, ya kihonol ya kana, ta êmén na paalihēn ya hakit hēn anak na, ya angkaboytoy inanawa. ⁴⁸ Kabay wani Apo Jesus, “Angga ha a yo angkahêlêk ya dyag ni Apo Namalyari ya kapapaêpapah, ay a kaw awud maniwala!” ⁴⁹ Noa, hinabi nan main tungkulan, “Apo, kihonol ka kangko ta êmén ya a matsu ya anak ko.” ⁵⁰ Amêhêن, hinabi ni Apo Jesus kana, ya wana, “Muli kay na, ta mabiyay ya anak mo, agyan a ko kilako.” Naniwala ya main tungkulan ha hinabi ni Apo Jesus kana, kabay nammita yay na. ⁵¹ Ha pamag-orong na ay tinupa ya hēn ipoh na, haka la hinabi ya ayn nanan hakit ya anak na. ⁵² Nahêن kinotang na hila no hinon oras yan namahig-pahig ya anak na, ay hinabi la, “Naalíh ya omot na naapon hēn a la una hēn maapon.” ⁵³ Muwang nan main tungkulan ya habayton oras êt, hēn hinabi ni Apo Jesus kana, ya, mabiyay ya anak na. Kabay hiya, haka hilay kalamo na ha bali, ay naniwala, ya hi Apo Jesus, ay hiyay Cristo.

⁵⁴ Habayto ya ikalwan kapapaêpapah ya dinyag ni Apo Jesus ha probinsyan Galilea. Dinyag nay habayto hēn ubat ya ha probinsyan Judea.

5

Namaalíh hi Apo Jesus hēn hakit ha allon pamagsimba

¹ Amêhêن, main miha pon ya pista lan Israelita ha Jerusalem. Kabay nakipista ya hi Apo Jesus.

² Bayro ha Jerusalem ha Templo, ay main pag-palyuan, ya pinata-ngalanan Betesda* ha habin Hebreo. Habayto ay ha danin ilwangan ya ambaêgêlan Pamihowênan tupa. Hatoy pagpalyuan ay main limay bubungan ya paghalilungan ha dani na. ³ Do ha hilong hêñ habaytoy bubungan, ay main bapan lakê ya ampaghakit. Main buwag, pilay, haka a ampakagalaw ya lawini, ya ampangênggan hêñ panggalaw hêñ hatoy lanêm, ⁴ ta ampaniwala hila ya paminghan-minghan, ay main lumatêng ya mihay anghel ni Apo Namalyari, ya ampangiho-kiho hêñ lanêm. No hinoy mu-munan makapaghugno ha lanêm, ya ubat hêñ kiniho-kiho hêñ anghel, ay angkaalihan hêñ kaganawan hakit. ⁵ Main mihay lalaki bayro, ya tatlumpo boy waloy taon nanan ampaghakit. ⁶ Nahêñ nahêlêk na ya ni Apo Jesus, haka muwang na ya nabuyot yay nan ampaghakit, ay kinotang na ya no labay na hêñ maalíh ya hakit na. ⁷ Wananaampaghakit, “Apo, labay ko, noa, ayn mami-aypa kangko ha lanêm no ubat hêñ nagalaw. Kabay panay kaatag ya miuna kangko ha lanêm.” ⁸ Wani Apo Jesus kana, “Mirêng ka. Hapwatêñ moy amak mo, ta mita kay na.” ⁹ Tambêng yan nirêng ta naalíh ya hakit na. Haka na hinonol ya hinabi ni Apo Jesus.

Allon pamagsimba lan Israelita hêñ habayto. ¹⁰ Kabay wanlan poon lan Israelita kanan inalihan hakit, “Allon pamagsimba amêhêñ. Bawal ha Kautuhan tamo hêñ mantan hêñ hinoman amêhêñ.” ¹¹ Noa, wana kanla, “Ya lalaki ya na-

* **5:2** Ha kaatag ya Kahulatan: Betsata o Bethzata.

maalíh hêñ hakit ko, ay naghabi kangko, ya hapwatêñ koy amak ko, ta mita kina.” ¹² Kabay wanla kana, “Hinoy naghabin habain kamo?” ¹³ Noa, a na muwang, no hino ya, ya namaalíh hêñ hakit na, ta ayn yay na bayro hi Apo Jesus, haka kal-atan tawo bayro.

¹⁴ Nahêñ nalyari ya habayto, ay natapol ni Apo Jesus ya hatoy lalaki, ya inalihan nan hakit ha Templo, haka wana kana, “Hêlkêñ mo, ayn kay nan hakit. Paan kay nan manyag kasalanan, ta kayno main narawak pon ya malyari kamo.” ¹⁵ Nammita ya hatoy lalaki, ta hinabi na kanlan poon lan Israelita, ya hi Apo Jesus, ya namaalíh hêñ hakit na. ¹⁶ Gawan ha pamaalíh nan hakit ha allon pamagsimba la, ay nag-umpisa hilay nan namairap kan Apo Jesus.

¹⁷ Noa, hinabi ni Apo Jesus kanla, “Ya Tatang ko, hi Apo Namalyari, ay ayn têgêñ ha pamangingalo. Êmêñ ako êt bayro kana.” ¹⁸ Gawan habaytoy hinabi na, ay lalo la yan labay hêñ patsêñ, alwan bêngat ha main yan dinyag, ya bawal ha allon pamagsimba, noa, gawan ha hinabi na êt, ya hi Apo Namalyari ay Tatang na. Ha pangahabi nan habayto, ay impantag nay sarili na kan Apo Namalyari.

Ya tungkulan ni Apo Jesus, ya Anak ni Apo Namalyari

¹⁹ Amêhêñ, wani Apo Jesus, “Pakagilamêñ yo, hiko, ya Anak ni Apo Namalyari, ay ayn akon madyag ha sarili kon kalabayan. Pandaygêñ kon bêngat ya angkahêlêk ko kan Apo Namalyari, ya Tatang ko, ta ya pandaygêñ na, ay pandaygêñ ko êt.

20 Panlugarûn ako ni Apo Namalyari, ya Tatang ko, haka ubuhêñ nan an-ipahlêk kangko ya dyag na. Haka igit pon di ay ipahlêk na kangko ya daygêñ ko, ta êmêñ kaw mag-êpapah. **21** Hi Apo Namalyari, ya Tatang ko ya ampamabiyay kanlan natsi, haka ampam-i kanla hêñ biyay ya ayn angga. Embayro êt, ay ampam-i kon biyay ya ayn angga kanlan labay kon dyanan. **22** Hi Apo Namalyari, ya Tatang ko, ay a manatol ha hinoman, ta indin nay na kangko ya habaytoy tungkulan, **23** ta êmêñ la kon igalang, ya Anak na, hêñ balang miha, hêñ nanad ha pamigalang la kan Apo Namalyari. No a la ko anggalangêñ, ay a la êt anggalangêñ hi Apo Namalyari, ya Tatang ko, ya namiutoh kangko.

24 “Pakagilamêñ yo! Hilay ampanggilam habi ko, haka ampaniwala kanan namiutoh kangko, ay main biyay ya ayn angga. Haka a hila hatolan hêñ parusaan ha impiyerno, ta gêtan hilay na ha biyay ya ayn angga. **25** Pakagilamêñ yo! Main tawo ya ayn paniwala kan Apo Namalyari. Nanad hilan natsi. Noa, paubat amêhêñ, ay magilam la ya habi ko, ya Anak ni Apo Namalyari. Haka hilay manonol ha habi ko, ay mabiyay hêñ ayn angga. **26** Gawan no ay-êmêñ ya Tatang ko, hi Apo Namalyari, ay main kapangyarihan hêñ mam-in biyay, ay êmbayro êt ay dinyanan na ko, ya Anak na, hêñ kapangyarihan hêñ mam-in biyay. **27** Haka hiko, ya Taga-Langit, ya In-anak Tawo, ay dinyanan na kon tungkulan hêñ hatolan hêñ parusaan hilay a ampaniwala kana. **28** Paan kaw mag-êpapah ha anhabiên ko, ta lumatêng ya allo, ay magilaman lan natsi ya baêg ko ha pinay-ilbêngan kanla.

29 Pamakagilam lan baêg ko, ay mipan-umawah hila. Hilay nanyag kangêran, ay dyanan biyay ya ayn angga. Haka hilay nanyag karawakan, ay hatolan hên parusaan hên ayn angga.

Hilay ampamaptêg hên para kan Apo Jesus

30 “Ayn akon madyag ha sarili ko, ta anhonolên koy kalabayan ni Apo Namalyari, ya namiutoh kangko. Makatoynungan ya pamanatol ko, gawan a ko anhonolên ya sarili kon kalabayan, ta anhonolên koy kalabayan na ya an-ipamwang na kangko.

31 “No kakapag ko ya ampaghabi hên para ha sarili ko, ay mahabi yo ya alwan pêtêg ya habayto. **32** Noa, main kaatag pon ya ampamipamwang hên tungkol kangko etaman. Yabay ya hi Apo Namalyari, ya Tatang ko, haka muwang ko ya panhabîen na ay pêtêg. **33** Namiutoh kaw hên ungnoy tawo kan Juan Bautista, haka ya hinabi ni Juan hên tungkol kangko ay pêtêg. **34** An-ipaihip ko ya habayto kamoyu, alwan gawan ha kailangan koy pamaptêg hên tawo, noa, gawan labay ko hên maniwala kaw, ya hikoy Cristo, ta êmén kaw miligtas ha parusa, ya hépat kamoyu. **35** Hi Juan Bautista, ay nanad hên pag-atáng ya impagkêt ni Apo Namalyari, ta êmén mam-in hawang. Haka hikaw ay hinumigla pon ha hawang na. **36** Pêtêg ya impamwang ni Juan, ya tungkol kangko, noa, maalagá pon bayro ya pandaygên ko, ya an-ipadyag na kangko ni Apo Namalyari, ya Tatang ko. Habaytoy pamaptêg ya in-utoh na ko. **37** Haka hi Apo Namalyari, ya Tatang ko, ya namiutoh

kangko, ay namipamwang, ya hikoy Cristo. Minghan man, ay a yo nagilam ya pamaghabi na, ni nahêlêk ya lupa na. ³⁸ Haka a yo intanêm ya hinabi na ha nakêm yo, gawan a kaw ampaniwala kangko, ya in-utoh na. ³⁹ Ampakapag-aralan yoy Kahulatan ya impahulat ni Apo Namalyari, ta êndat yo no daygên yoy habayto, ay madyanan kaw hêñ biyay ya ayn angga. Ha Kahulatan ay impamwang ya tungkol kangko. ⁴⁰ Noa, a kaw ampaidani kangko, ta êmêñ kaw madyanan biyay ya ayn angga.

⁴¹ “A ko ampanapol hêñ pamagpuri hêñ tawo, ⁴² gawan muwang ko ya a yo anlugurêñ hi Apo Namalyari. ⁴³ In-utoh na ko di ni Apo Namalyari, ya Tatang ko, noa, a yo ko paniwal-an. No main lumatêng di ya ampamitag-ay hêñ sariili na, ay ampaniwal-an yo ya. ⁴⁴ A kaw ampaniwala kan Apo Namalyari gawan antapolêñ yoy pamandayêw hêñ kapareho yo, haka a kaw ampanapol hêñ pamandayêw ni Apo Namalyari, ya kamiha-mihaan Diyos. ⁴⁵ Paan yon ihipêñ ya hikoy mamidikil kamoyu ha arapan ni Apo Namalyari, ya Tatang ko. Hi apo Moises, ya mamidikil kamoyu ta êndat yo ya anhonolêñ yoy intoro na. ⁴⁶ No pêtêg dayi ya paniwala yo ha hinulat ni apo Moises, ay paniwal-an yo ko etaman, ta nanulat ya hêñ tungkol kangko. ⁴⁷ Noa, gawan a kaw ampaniwala ha hinulat ni apo Moises ya tungkol kangko, ay a kaw etaman maniwala ha habi ko!”

*Liman libo ya tawo ya pinakan ni Apo Jesus
(Mateo 14:13-21; Marcos 6:30-44; Lucas 9:10-17)*

¹ Amêhêñ, namatah hilan Apo Jesus ha lipay hên Dagat-dagatan hên Galilea, ya ambaêgêñ lan kaatag ya Dagat-dagatan hên Tiberias. ² Kal-atan ya ampakihonol kanla, gawan kapapaêpapah ya dinyag na ha pamaalíh hêñ hakit lan ampaghakit. ³ Nilumakat hilan Apo Jesus ha babo, ta nikno ya bayro hên kalamo na hilay tagahonol na. ⁴ Hêñ habayto ay marani ya Pista hên Kaligtasan. ⁵ Nahêñ manlêk hi Apo Jesus ay nahêlêk nay kal-atan ya andumani kanla. Hinabi na kan Felipe, “Antoy mapanaliwan tamon maipakan kanlan hata kal-atan?” ⁶ Hinabi nay habayto ta hêlkêñ na no ay-êmêñ ya paniwala ni Felipe. Muwang nay na ni Apo Jesus ya daygêñ na. ⁷ Hinabi ni Felipe kana, “Apo, kulang pon ya suweldo hên mi-hay katawo ha anêm ya buwan* hên panaliw hên maêkan lan hata kal-atan, agyan manipérad bat ya kaêñ la.” ⁸ Miha kanlan tagahonol ni Apo Jesus ya hi Andres, ya kapotoh pohêl ni Simon Pedro ya naghabi, ⁹ “Main mihay anak ya lalaki di, ya main limay puto, haka loway kênan lanêm. Noa, kulang ya habayto ha kal-atan.” ¹⁰ Amêhêñ, wani Apo Jesus, “Paiknoêñ yo hila.” Makwal ya pagpastolan bayro, kabay nikno hilay liman libo ya lalaki haka hilay kalamo la. ¹¹ Kingwa ni Apo Jesus ya hatoy limay puto, haka panga-ubat nan impahalamat ya habayto kan Apo Namalyari, ay indin na kanlan ampikno ta pinitatayakan la. Êmbayro êt ya dinyag

* **6:7** 200 denaryo ha habin Griego.

na ha kēnan lanêm. Nangan hila hēn angga ha mabay hila. ¹² Nahēn nabhoy hila ay impa-tsipon ni Apo Jesus kanlan tagahonol na ya natagan, ta êmêñ ayn mahayang. ¹³ Kabay tsinipon lay na ya tagan. Nakapno hila êt hēn labinloway lubon hēn tagan hēn hatoy limay puto.

¹⁴ Gawan nahēlēk lan kal-atan ya habaytoy kapapaêpapah, ya dinyag ni Apo Jesus, ay hinabila, “Hiyan taganá ya Cristo, ya Propeta ya anêngganan tamo, ya in-utoh di ha luta.” ¹⁵ Nahēn namwangan ni Apo Jesus, ya labay la hēn dumani kana, ta palêkpêkên la ya hēn daygêñ ari la, ay nagpabokol yan nilumakat ha bung-oy hēn nanalangin.†

*Nammita hi Apo Jesus ha babo hēn lanêm
(Mateo 14:22-33; Marcos 6:45-52)*

¹⁶ Nahēn yabi yana, nilumohan hilay tagahonol na ha dagat-dagatan. ¹⁷ Hinumakay hila ha mihay bangka ta lumipay, ha balayan Capernaum. Nariglêm ana, noa, ayn ya êt hi Apo Jesus. ¹⁸ Hinumkaw ya angin, kabay matandulon ha dagat-dagatan. ¹⁹ Nahēn nidayo hilay na hēn lima, o anêm ya kilometro ha laylay hēn lanêm, ay nahēlēk la hi Apo Jesus, ya ampammita ha lanêm, hēn andumani ha bangka. Nalimwan hila, ta êndat la no hiya ay mihay kamana.‡ ²⁰ Noa, wana kanla, “Paan kaw malimo! Hikoy habaytsi!” ²¹ Kabay mahigla la yan hinagyat hēn pinahakay ha bangka, haka tambêng hilan nakalatêng ha dani hēn Capernaum.

† **6:15** Mateo 14:23, Marcos 6:46. ‡ **6:19** Marcos 6:49.

Tinapol lan kal-atan hi Apo Jesus

22 Ha humonoy allo, bayro ha ubatan lan Apo Jesus, ay an-êngganan la yan kal-atan. Èndat la no a ya pon nag-alih bayro, ta nahêlêk la, ya a ya hinumakay ha bangka hên kalamo na hilay tagahonol na, ta kakapag la ya hinumakay bayro, haka ayn kaatag ya bangka bayro. **23** Amêhêñ, main ungnoy bangka ya ubat ha Tiberias ya nilumatêng bayro ha narani ha pinanganan lan puto hên ubat nan pinahalamatan ni Panginoon Jesus. **24** Nahêñ namwangan lan tawo ya ayn ana bayro hi Apo Jesus, haka ayn etaman bayro hilay tagahonol na, ay hinumakay hila bayro ha nilumatêng ya bangka, ta tapolêñ la hi Apo Jesus ha Capernaum.

Hi Apo Jesus, ya pamangan, ya ampam-in biyay

25 Nahêñ natapol la ya ha lipay lanêm ay hinabi la kana, “Mánoro, nakano kan nilumatêng di?” **26** Kabay wani Apo Jesus, “Pakagilamêñ yo, antapolêñ yo ko, gawan nabhoy kaw ha puto ya pinalakê ko, alwan gawan naintindihan yoy kapapaêpapah ya dinyag ko. **27** Alwan kakapag pamangan ya angkaronot, ya dapat yon pagpagalan. Noa, dapat pagpagalan yo etaman ya pamangan ya makab-in biyay, ya ayn angga hên kalamo ni Apo Namalyari. Hiko ya Taga-Langit, ya Inanak Tawo, ya mam-i kamoyu hên pamangan ya makab-in biyay, ta hikoy dinyanan kapangyarihan ni Apo Namalyari, ya Tatang ko.”

28 Amêhêñ, kinotang la kan Apo Jesus, “Apo, hinoy kailangan naêñ daygêñ, ta êmêñ kay makadyag hên kalabayan ni Apo Namalyari?”

29 Kabay wani Apo Jesus, “Habaytsi ya labay ni

Apo Namalyari ya daygên yo: paniwal-an yo ya hikoy Cristo ya in-utoh na.”³⁰ Kabay wanla kana, “Apo, no êmbayro, ay hinoy kapapaépapah ya daygên mo, ta êmén kay maniwala ya hika ya Cristo? Hinoy daygên mo?³¹ Ya ninuno tamo ay nangan hén manna ha kabalah-balahan hén êmén ha nakahulat ha habi ni Apo Namalyari, ‘Dinyanan na hilan kaén ya ubat ha langit.’”³² Amêhén, wani Apo Jesus kanla, “Pakagilamén yo. Alwan hi apo Moises, noa, hi Apo Namalyari ya nam-i kanlan ninuno yo hén manna ya kaén* ya ubat ha langit. Haka amêhén hi Apo Namalyari, ya Tatang ko, ay ampam-i kamoyu hén pêtêg ya kaén, ya ubat ha langit.³³ Ta ya pêtêg ya kaén, ya pan-idin ni Apo Namalyari, ay yabay ya ubat ha langit, ya ampam-in biyay ya ayn angga ha tawo.”³⁴ Amêhén, hinabi la kana, “Panginoon, lawah mo kay dayi hén dyanan hén habaytoy kaén.”³⁵ Wani Apo Jesus kanla, “Hikoy kaén ya ampam-in biyay ya ayn angga. Hilay andumani kangko, ay a lonohén, haka hilay ampaniwala kangko, ay ahina hén maangan oman.

³⁶ “Noa, hinabi kina kamoyu ya nahêlêk yo ko man, ay a kaw maniwala kangko.³⁷ Tinalagá ni Apo Namalyari, ya Tatang ko no hino hilay makapakilamo kangko. Dumani hila kangko haka tanggapên ko hila.³⁸ Ta ubat ako ha langit, ta êmén ko daygên ya kalabayan ni Apo Namalyari ya namiutoh kangko, alwan para daygên ya kalabayan ko.³⁹ Ya kalabayan nan namiutoh kangko,

§ **6:31** Ha habin Griego: puto. Habaytoy mabaha ha Exodo 16:4-5.

* **6:32** ha Griego: puto.

ay ha Allon Pamanukom, ay biyayêñ kon oman hilay tinalagá na hêñ makapakilamo kangko. ⁴⁰ Ta ya kalabayan ni Apo Namalyari, ya Tatang ko, ay hilay ampakamwang kangko, haka ampaniwala kangko, ya Anak na, ay dyanan biyay ya ayn angga. Haka hiko ya mamabiyay kanla ha Allon Pamanukom.”

⁴¹ Hêñ ampaghabi ya êt hi Apo Jesus, ay main Israelita ya nagmulongan, gawan hinabi na ya hiyay kaén ya ubat ha langit. ⁴² Amêhêñ, nagmulongan hila, ya wanla, “Hiya hi Jesus ya anak ni Jose. Kilala tamoy indo na haka tatang na. Ay êmêñ nan mahabi ya ubat ya ha langit?” ⁴³ Kabay wani Apo Jesus, “Paan kaw magmulongan hêñ êmbayro. ⁴⁴ Ayn makarani kangko no a hila ipakarani kangko ni Apo Namalyari, ya Tatang ko, ya namiutoh kangko. Haka hikon taganá ya mamabiyay kanla ha Allon Pamanukom. ⁴⁵ Nakahulat ha mihay hulat lan mampipamwang ni Apo Namalyari hêñ hato, ‘Toroan hilangan ni Apo Namalyari.’[†] Kabay kaganawan ya ampanggilam habi ni Apo Namalyari haka ampakamwang bayro, ay dumani kangko. ⁴⁶ Habaytoy a labay habiên ya main nanan nakahêlêk kan Apo Namalyari, ya Tatang ko, ta ayn nakahêlêk kana no alwan kakapag ko ya ubat kana.

⁴⁷ “Pakagilamêñ yo. Hilay ampaniwala kangko, ay main biyay ya ayn angga. ⁴⁸ Hikoy nanad kaêñ[‡] ya ampam-in biyay ya ayn angga. ⁴⁹ Hi Apo Namalyari ay nam-in kaén ya ambaêgêñ lan manna kanlan ninuno yo hêñ haton atsi hila ha kabalah-

[†] **6:45** Isaias 54:13. [‡] **6:48** Ha Griego: puto.

balahan, êmbayro man ay natsi hila. ⁵⁰ Noa, hilay mangan hên pêtêg ya kaên ya ubat ha langit, ya inungkat ko, ay ahinan matsi. ⁵¹ Haka hiko ya maialimbawa ha pêtêg ya kaêns[§] ya ubat ha langit, ya ampam-in biyay ya ayn angga. Hilay mangan habaytsi ya kaên ay madyanan biyay ya ayn angga. Ya kaên ya idin ko ay lawini ko, ta êmén kaganawan ay madyanan biyay ya ayn angga.”

⁵² Gawan habaytoy hinabi ni Apo Jesus, ay ni-huhubakan hilay kaatag Israelita, ya wanla, “Ay êmén nan maidin kantamoy lawini na, ta êmén tamon kaên ya habayto?”

⁵³ Kabay wani Apo Jesus, “Pakagilamén yo. No a kaw mangan lawini ko, hên Taga-Langit, ya Inanak Tawo, haka no a kaw minêm daya ko, ay ayn kaw hên biyay ya ayn angga. ⁵⁴ Hilay ampangan hên lawini ko, haka ampinêm hên daya ko, ay main biyay ya ayn angga, haka biyayêñ ko hila ha Allon Pamanukom. ⁵⁵ Ya lawini ko ay mantêg kaên haka ya daya ko ay mantêg pan-inêmén. ⁵⁶ Hilay ampangan hên lawini ko haka ampinêm hên daya ko ay main pakikimiha kangko, haka hikoy main pakikimiha kanla. ⁵⁷ In-utoh ako ni Apo Namalyari, ya Tatang ko, ya angkabiyay. Haka angkabiyay ako gawan ha kapangyarihan na. Êmén êt bayro mabiyay hilay mangan lawini ko gawan ha kapangyarihan ko. ⁵⁸ Hikoy maialimbawa ha pêtêg ya kaên ya ubat ha langit, haka hilay mangan hên habaytsi, ay mabiyay hên ayn angga. Habaytsi ya kaên ay alwan nanad ha kaên ya indin ha ninuno yo. Nangan hila noa, natsi hila morin.”

§ **6:51** Ha Griego: *puto*.

59 Hêñ hinabi ni Apo Jesus ya habayto, ay atsi ya ha sinagoga ha Capernaum hêñ ampanoro.

60 Mal-at kanlan antoroan ni Apo Jesus, ya nanggilam hêñ habaytoy hinabi na, ay naghabin, “Nabyat ya habaytoy hinabi na. Kayno ayn maniwala kana.”

61 Muwang ni Apo Jesus ya nagmulongan hilay kaatag ya antoroan na, kabay hinabi na, “Gawan habaytoy hinabi ko, ay labay yo kon lakwanan? **62** Hino awud ya daygêñ yo no mahêlêk yo ko, ya Taga-Langit, ya In-anak Tawo, hêñ paitag-ay ha langit, ha ubatan ko? **63** Ya Espiritu ni Apo Namalyari ya mam-in biyay ya ayn angga. Alwan tawo ya ampam-in habayto. Ya hinabi ko ay ubat ha Espiritu ni Apo Namalyari, haka habaytoy ampam-in biyay ya ayn angga. **64** Noa, main kaatag kamoyu ya a ampaniwala ha hinabi ko.” Ta ubat hêñ una, ay muwang nay na ni Apo Jesus no hino hila ya a maniwala kana, haka no hino ya mangi-upit kana. **65** Wana êt, “Gawan muwang ko ya main kamoyu ya a ampaniwala kangko, ay hinabi ko ya ayn makapaidani kangko no alwan kalabayan ni Apo Namalyari, ya Tatang ko.”

66 Paubat hêñ habayto ay nilakwanan la hi Apo Jesus hêñ mal-at kanlan antoroan na, haka a hilay na ampakihonol kana. **67** Amêhêñ, hinabi ni Apo Jesus kanlan labinloway tagahonol na, “Labay yo ko etaman hêñ lakwanan?” **68** Kabay wani Simon Pedro, “Panginoon, hino ya lakwêñ naêñ? Kakapag mo ya main habi ya ampam-in biyay ya ayn angga! **69** Ampaniwala kay kamo, haka muwang naêñ taganá ya hika ya Cristo, ya

ayn hinon kasalanan, ya in-utoh ni Apo Namalyari.” ⁷⁰ Amêhén, hinabi ni Apo Jesus kanla, “Awo, gawan hikoy namili kamoyu, ya labinloway tagahonol ko. Êmbayro man, ya miha kamoyu ay mahuloran ni Satanas.” ⁷¹ Ya inungkat na, ay yabay ya miha kanlan labinloway tagahonol na, ya hi Judas, ya anak ni Simon, ya taga-Iscariote ta hiyay mangi-upit kana.

7

Hi Apo Jesus haka hilay patêl na

¹ Amêhén, ay nanoro ya tana hên kalamo na hilay tagahonol na ha probinsyan Galilea. A nay na pon labay hên manoro ha probinsyan Judea, gawan labay la yan patsên bayro hên poon lan Israelita. ² Marani yanay Pista hên Tolda, yabay ya mihay pista lan Israelita ta êmén la maihipan ya pamangillag ni Apo Namalyari ha ninuno la, haton atsi hila ha kabalah-balahan. ³ Kabay hinabi hên ali na kana, ya wanla, “Awta a ka mag-alíh din maniraw ha probinsyan Judea, ta êmén hilay anhumonol kamo bayro, ay makahêlêk hên kapapaêpapah, ya andaygên mo. ⁴ Ta no labay mo hên mamwangan la ya tungkol kamo, ay ipamwang minay andaygên mo. No ampanyag ka hên kapapaêpapah, ay ipamwang mina dayi.” ⁵ Hinabi lay habayto ta hila man, ay a ampaniwala kana. ⁶ Hinabi ni Apo Jesus kanla, “Laamêhén akon mita, ta alwa ko pon oras. Noa, hikaw, ay malyari kaw nan mita ha hinoman ya oras ya labay yo. ⁷ Alwan hikaw ya angkahêmêkan lan tawo, noa, hikoy angkahêmêkan la, gawan an-ipamwang ko

ya nangarawak ya dyag la. ⁸ Hikaw tana ya makipista, ta a kina pon makipista gawan alwa pon oras hēn hikoy mita.” ⁹ Pangahabi nan habayto ay napaibalag ya ha Galilea.

Nakipista hi Apo Jesus ha Pistan Tolda

¹⁰ Hēn nammitay nay ali na, ay nammita ya etaman hēn ayn nakamwang. ¹¹ Bayro ha balayan Jerusalem ay antapolên la yan poon lan Israelita ha pista, ta wanla, “Anto ya?” ¹² Ampihahabian lan tawo no hino ya. Main naghabi, “Mangēd yan tawo.” Wanla etaman hēn kaatag, “Anlokoēn nay tawo.” ¹³ Noa, gawan ha limo la kanlan ampamaala, ay ayn naghabi hēn tungkol kana ha arapan lan kal-atan.

¹⁴ Hēn ika-apat ya allo hēn pista, ay hinumwēn hi Apo Jesus ha Templo, ta nanoro ya bayro.

¹⁵ Nakaêpapah hilay poon lan Israelita, ta wanla, “Antoy pinangwanan nan hata tawo, hēn kamwangan na, ya a ya man nag-aral?”

¹⁶ Kabay wani Apo Jesus, “Ya pan-itoro ko ay alwan ubat kangko, noa, ubat kan Apo Namalyari ya namiutoh kangko. ¹⁷ Hilay mabay hēn manyag kalabayan na, ay mamwangan, no ya an-itoro ko ay ubat kana, o no panhabiēn kon bat ya laman ihip ko. ¹⁸ Hilay ampamitoro hēn ubat ha sarili lan kaihipan, ay ampanapol hēn paman-dayēw hēn kapareho la. Noa, hilay mabay hēn padayēw ya namiutoh kanla ay mapaypaniwal-an haka taganán alwan malarām. ¹⁹ Hi apo Moises ya nam-i kamoyu hēn Kautuhan ni Apo Namalyari. Noa, a yo anhonolên ya habayto, ta labay yo kon patsēn.”

20 Nahêñ nahabi nay habayto, ay wanla, “Nahapatian kan narawak ya a angkahêlêk. Ayn mabay hêñ mamatsi kamo!”

21 Wani Apo Jesus, “Mimihay dinyag ko ha allon pamagsimba haka naubuh kaw hêñ nag-êpapah. **22** Dinyanan na kaw ni apo Moises hêñ utoh ya tulien yoy anak yo ha ikawalon allo hêñ ubat in-anak, haka an-ipatuli yo hila, allo man hêñ pamagsimba. Habayto ay manan ugali lan ninuno yo bayo dinyag ya Kautuhan ni apo Moises ya ubat kan Apo Namalyari.* **23** No an-ipatuli yoy anak yo ha allon pamagsimba, ta êmêñ mahonol ya Kautuhan ni apo Moises, awta anhulukêñ yo ko gawan namaalih akon hakit hêñ boon lawini hêñ mihay lalaki ha allon pamagsimba! **24** Paan kaw bat mam-in hatol ha angkahêlêk yon bêngat, noa, imbistigaêñ yo pon bayo kaw manatol.”

Ampihahabian la no hi Apo Jesus ya Mesias, ya Cristo

25 Amêhêñ, main kanlan taga-Jerusalem ya naghabi, “Yabay ya labay lan patsêñ hêñ poon tamo. **26** Atsi ya di hêñ ampaghabi ha arapan hêñ kal-atan haka a la ya bawalêñ. Kayno muwang lan poon, ya pêtêg ya, hêñ hiyay Mesias, ya Cristo, ya impangakon Mâmiligtas ya pinili ni Apo Namalyari hêñ mamaala. **27** Noa, muwang tamo no ay-iri yan mangubat, haka no lumatêng ya pêtêg ya Mesias, ya Cristo, ay ayn kanon makamwang no ay-iri yan mangubat.”

28 Kabay in-ikhaw ni Apo Jesus ya pamaghabi na ha panoro na ha Templo. “Awo, muwang yo

* **7:22** Levítico 12:3.

no hino ko, haka no ay-iri kon nangubat. Noa, main namiutoh kangko, haka a yo ya muwang ya habayto. Hiyay pêtêg. ²⁹ Kilala ko ya, ta hiyay namiutoh kangko, haka ubat ako kana.”

³⁰ Kabay labay la yan dakpên, noa, ayn makarakêp kana, ta alwa na pon oras. ³¹ Noa, mal-at ya naniwala ya hiyay Mesias, ya Cristo, ta wanla, “No alwa yan Mesias, ya Cristo ya habaytsi, no lumatêng ya pêtêg ya Mesias, ya Cristo, ay makadyag ya kaya hên mal-at pon ya kapapaêpapah?”

Dakpên la ya dayi hên tanod hi Apo Jesus

³² Nagilam lan Pariseo ya pagmulong lan tawo ya tungkol kan Apo Jesus. Kabay namiutoh hila, haka hilay ampamaala kanlan pari hên tanod hên Templo, hên dakpên ya. ³³ Amêhê, wani Apo Jesus, “Pêrad tanay panahon hên makalamo yo ko, ta ahina mabuyot ay mag-orong kina ha namiutoh kangko. ³⁴ Tapolên yo ko bayto. Noa, a yo ko matapol gawan a kaw makalako ha lakwên ko.”

³⁵ Kabay wanlan poon lan Israelita ha miha ta miha, “Ato awud ya lakwên na ta a tamo ya matapol? Mako ya kaya kanlan Israelita, ya atsi bayro ha bansan Griego, ta toroan na hila, haka hilay kabansa la?” ³⁶ “Hino awud ya labay habiên hên hata hinabi na, ‘Tapolên yo ko man, ay a yo ko mahêlêk,’ haka ‘Ya lakwên ko, ay a yo malako?’”

Hilay ampaniwala kan Apo Jesus ay dyanan hên bayoy biyay nan Espiritu ni Apo Namalyari

³⁷ Ha ikawalon allo, ya pinakamaalagáy allo hên pista, ay nirêng hi Apo Jesus, ta nan-angaw ya, “No angkaangan kaw, ay dumani kaw kangko,

ta minêm kaw. ³⁸ Nakahulat ha Kahulatan ya impahulat ni Apo Namalyari, ‘No maniwala kaw kangko, ay magkamain kaw hên biyay ya nanad sibol ha nakêm yo ya a angkaubuhan lanêm.’” ³⁹ Ya inungkat ni Apo Jesus, ay Espiritu ni Apo Namalyari, ya idin ha balang ampaniwala kana. A ya pon na-idin ya hatoy Espiritu ni Apo Namalyari, gawan a ya pon natsi, haka nabiyay oman hi Apo Jesus.

No hinoy laman ihip lan tawo tungkol kan Apo Jesus

⁴⁰ Main kanlan kal-atan bayro ya nakagilam hên hinabi ni Apo Jesus, ya naghabin, “Yabay yan taganá ya Propeta ni Apo Namalyari, ya an-êngganan tamo.” ⁴¹ Hilay kaatag, ay naghabin hiyay Mesias, ya Cristo. Noa, wanlan kaatag pon, “A ya maubat ha Galilea ya Mesias. ⁴² Nakahulat ha Kahulatan ya impahulat ni Apo Namalyari ya hiyay Mesias, ay maubat ha kaapo-apoan ni Arin David, haka ha Betlehem yan ianak ha balayan ni Arin David.” ⁴³ Alwan mimihay ihip lan kal-atan ya tungkol kan Apo Jesus. ⁴⁴ Labay lan kaatag, hên dakpêñ ya, noa, a la ya dinakêp.

Hilay poon lan Israelita ay a naniwala, ya hi Apo Jesus, ay hiyay Mesias, ya Cristo

⁴⁵ Nahêñ nag-orong hilay tanod hên Templo kanlan ampamaala kanlan pari haka kanlan Pariseo, ay kinotang lan Pariseo kanlan tanod, “Awta a yo ya gintan di?” ⁴⁶ Wanlan guardya etaman, “A naêñ ya dinakêp, ta ayn kay êt nagilam ya magaling maghabi hên nanad kana.” ⁴⁷ Amêhêñ, hinabi lan Pariseo, “Kayno naamuyot na kaw etaman.

⁴⁸ Ayn kannaēn ya Pariseo o manungkulān ya ampaniwala kana. ⁴⁹ Kakapag lan kal-atan, ya ayn muwang hēn tungkol ha Kautuhan tamon Israelita, ay ampaniwala kana. Parusaan hila ni Apo Namalyari.” ⁵⁰ Ya miha kanlan Pariseo bayro ay hi Nicodemo, ya dinumani kan Apo Jesus hēn hato. Wana kanan kalamo na, ⁵¹ “Bawal kanlan Kautuhan tamo hēn parusaan ya mihay tawo, no a ya pon naimbistiga.” ⁵² Kabay wanla kan Nicodemo, “Taga-Galilea ka etaman? Bahaēn moy Kahulatan ya impahulat ni Apo Namalyari, haka mo mamwangan ya ayn propeta ni Apo Namalyari ya maubat ha Galilea.” ⁵³ Bayo nuli hilangan.

8

Ya babayi ya narakēp ha pamakilalaki

¹ Hi Apo Jesus etaman, ay nilumakath ha Tawtgug Olibo. ² Hēn pangamaranon, ay nilumatēng yay na êt ha Templo hēn manoro. Mal-at ya dinumani kana hēn labay manggilam habi na, kabay nikno yan nanoro kanka. ³ Kaban ampikno ya bayro, ay main nilumatēng ya kaatag kanlan mánoron Kautuhan ni apo Moises, haka ya kaatag kanlan Pariseo. Main hilan gintan ya mihay babayi ya narakēp ha pamakilalaki. Pinairēng la ya ha arapan lan kal-atan. ⁴ Bayo wanla kan Apo Jesus, “Mánoro, hata babayi ay narakēp ha pamakilalaki. ⁵ Nakahulat ha Kautuhan ni apo Moises ya kailangan batoēn ya hilay babayi ya êmēn di angga ha matsi hila. Noa, hinoy mahabi mo ya tungkol kana?” ⁶ Hinabi lay habayto ta subukēn la ya no

magkamali hi Apo Jesus ha pakibat na, ta êmên hila magkamain hêñ ibara kana.

Ya dinyag ni Apo Jesus ay, napaiyoko ya, ta pinanulat nay panoron gamêt na ha luta.

⁷ Gawan ha pamihundo lan mangotâng kana, ay nirêng ya, ta wana, “No main kamoyu ya a nakadyag hêñ hinon bawal ha Kautuhan, ay hiyay munan mamato kana.” ⁸ Nahêñ nahabi nay habayto, ay inhundo nay panulat na ha luta.

⁹ Hêñ pamakagilam lan hinabi na, ay tsiha-tsiha hilan nammita ya hilay nantan habaytoy babayi kan Apo Jesus. Nunan nammita hilay matoa kanla. Nabalag tana hi Apo Jesus haka hatoy babayi, ya nakairêng ha arapan na. ¹⁰ Amêhêñ, nirêng hi Apo Jesus ta hinabi na kanan babayi, “Anto hilay nay nantan kamo di? Ayn namarusa kamo?”

¹¹ Kabay wanlan babayi, “Ayn Apo.”

Amêhêñ, wani Apo Jesus, “Hiko man, ay a kata parusaan. Mita kay na, haka itêgêñ minay pa-manyag mon kasalanan.”

Hi Apo Jesus, ya hawang

¹² Amêhêñ, naghabi yay na êt ha kal-atan hi Apo Jesus. Wana kanla, “Hikoy hawang lan tawo. Hilay humonol kangko, ay madyanan hawang, ya ampam-in biyay, ya ayn angga hêñ kalamo ni Apo Namalyari. Maalíh ya kariglêman nakêm la.”

¹³ Kabay wanlan Pariseo kana, “Mimiha mo, ya ampaghabin habain, kabay a ya malyarin paniwal-an ya habi mo.”

¹⁴ Wani Apo Jesus kanla, “Ampamaptêg ako man hên tungkol ha sarili ko, ay malyari yon paniwal-an ya anhabiên ko, ta muwang koy ubatan ko, haka muwang ko ya lakwên ko. Noa, a yo muwang ya ubatan ko, haka a yo muwang ya lakwên ko.

¹⁵ Ya pamanatol yo ay ubat ha kaihipan yo di ha luta, noa, a ko anhatolan ya hinoman. ¹⁶ No manatol ako man, ay makatoynungan ya pamanatol ko, ta alwan kakapag ko ya ampanatol, ta kalamo ko hi Apo Namalyari, ya Tatang ko, ya namiutoh kangko. ¹⁷ Ha Kautuhan yo, ay nakahulat ya no pareho ya pamaptêg hên loway katawo, ay dapat paniwal-an ya pamaptêg la. ¹⁸ Lowa kay ya ampamaptêg hên tungkol kangko. Hikoy ampaghabi hên tungkol kangko, haka hi Apo Namalyari, ya Tatang ko, ya namiutoh kangko, ay ampamaptêg êt, kabay mapaniwal-an yoy anhabiên naên.”

¹⁹ Kabay hinabi la kana, “Antoy tatang mo?”

Wani Apo Jesus, “A yo ko kilala, haka a yo kilala ya Tatang ko. No kilala yo ko dayi, ay makilala yo etaman ya Tatang ko, hi Apo Namalyari.”

²⁰ Hinabi ni Apo Jesus ya habayto hên ampanoro ya ha dani hên pamyanan hên pera ya an-ialay ha Templo. Ayn nandakêp kana, ta alwa na pon oras.

Hilay a ampaniwala kan Apo Jesus ay a makahowên ha langit

²¹ Amêhêñ, hinabi nay na êt kanla, “A mabuyot ay mita kina. Kanan habayto ay pakatapolên yo ko, noa, matsi kaw hên a kaw napatawad. A kaw makalako ha lakwên ko.” ²² Amêhêñ, hinabi lan poon lan Israelita, “Kayno magpakamatsi ya. Ta wana, ‘A kaw makalako ha lakwên ko.’”

²³ Amêhén, wana kanla, “Hikaw ay taga-bayri, ha luta. Hikoy taga-langit. ²⁴ Kabay hinabi kina kamoyu, ya matsi kaw hén a kaw pon mapatawad. Ta a kaw mapatawad, no hikaw ay a maniwala ya ‘Hikoy Hiko taganá.’” ²⁵ Amêhén, hinabi la kana, “Hino ka?” Kabay wani Apo Jesus kanla, “Hiko ya hatoy hinabi kina kamoyu paubat hén una. ²⁶ Mal-at ya mahabi ko, ya maipintas kamoyu. Noa, pêtêg ya habi ni Apo Namalyari ya namiutoh kangko, haka ipamwang kon bêngat ya nagilam ko kana.”

²⁷ A la naintindihan ya ampaghabi ya hén tungkol kan Apo Namalyari, ya Tatang na. ²⁸ Kabay wani Apo Jesus, “Lano no naipako yo kina ha koros, ay mamwangan yoy na ya hiko, ya Taga-Langit, ya In-anak Tawo, ay hikoy Mesias, ya Cristo ya nanad ha hinabi kina. Kanan habayto, ay mamwangan yo etaman, ya kaganawan dyag ko, haka habi ko, ay impadyag kangko ni Apo Namalyari, ya Tatang ko. ²⁹ Kalamo ko di hi Apo Namalyari, ya namiutoh kangko. A na ko anlakwanan, ta panay kon andaygén ya kalabayan na.” ³⁰ Mal-at kanlay nakagilam hén habayto ay naniwalan hiyay Mesias, ya Cristo.

Hilay nagpa-ipoh ha kasalanan

³¹ Amêhén, hinabi ni Apo Jesus kanlan Israelita, ya naniwala kana, “No ihundo yoy pamanhumonol yo ha an-itoro ko, ay hikaw ya pêtêg kon tagahonol, ³² ta mamwangan yoy kaptégan, haka ya kaptégan ay mamialih kamoyu ha panga-ipoh.”

³³ Kabay hinabi la, “Hikay ya kaapo-apoan ni apo Abraham. Haka a kay êt nagpa-ipoh. Awta hinabi mo ya mag-alih kay ha panga-ipoh?”

³⁴ Hinabi ni Apo Jesus kanla, “Pakagilamên yo. Hilay ampanyag kasalanan, ay ampagpa-ipoh ha kasalanan. ³⁵ Ya ipoh, ay ampakilamo bat ha pamilyan amo na, noa, ya anak nan amo ay kalamo bayro hên ayn angga. ³⁶ No hiko, ya Anak ni Apo Namalyari, ya mamibuhan kamoyu ha pangaipoh yo, ay taganán mibuhan kaw ha pangaipoh. ³⁷ Muwang koy kaapo-apoan kaw ni apo Abraham. Noa, kaapo-apoan kaw man ni apo Abraham, ay labay yo kon patsên, gawan a yo labay pahowênen ya habi ko ha nakêm yo. ³⁸ Ya panhabiên ko, ay yabay ya namwangan ko kan Apo Namalyari, ya Tatang ko. Haka hikaw man, ay ampanyag hên namwangan yo ha tatang yo.”

Hi Satanas ya tatang la

³⁹ Hinabi la kana, “Hi apo Abraham ya tatang naên.” Amêhêñ, hinabi ni Apo Jesus kanla, “No hikaw ay taganán anak ni apo Abraham, ay ampanyag kaw dayi hên dinyag na. ⁴⁰ Noa, labay yo kon patsên, ya hiko ya ampaghabin kaptêgan, ya nagilam ko kan Apo Namalyari. Ayn yan dinyag hên êmbayro hi apo Abraham ta hiyay nanggilam kan Apo Namalyari. ⁴¹ Ya pandaygên yo ay nanad ha dinyag hên tatang yo.” Kabay wanla kana, “Alwa kay anak hên kaatag. Mimihay Tatang naên haka yabay ya hi Apo Namalyari.”

⁴² Bayo wani Apo Jesus, “No pêtêg ya hi Apo Namalyari ya Tatang yo, ay lugurên yo ko dayi, ta hikoy ubat kana, haka atsi kina di. A ko nilumatêng di hên gawan bat ha sarili kon ihip, noa, gawan in-utoh na ko. ⁴³ A yo angkaintindi-han ya anhabiên ko, gawan a yo labay gilamên

ya panhabiên ko. ⁴⁴ Hi Satanas ya tatang yo. Ta no hinoy labay na, ay yabay ya andaygén yo. Hiyay mapamatsin tawo ubat hēn haton una. A na labay ya kaptégan, kabay pérad man, ay ayn taganán kaptégan kana. No maghabi ya, ay panay kalaraman ta taganán mapaglaram ya, haka hiyay ampangubatan hēn kaganawan kalaraman. ⁴⁵ Noa, gawan anhabiên koy kaptégan, ay a yo ko ampaniwal-an. ⁴⁶ Yarin main kamoyu ya makahabin nakadyag akon kasalanan? No pêtég ya panhabiên ko, ay awta a yo ko paniwal-an? ⁴⁷ Hilay ubat kan Apo Namalyari, ay ampanggilam habi na. Alwa kaw ubat kan Apo Namalyari, kabay a yo panggilamên ya habi na.”

Hi Apo Jesus haka hi apo Abraham

⁴⁸ Amêhêñ, hinabi lan Israelita kan Apo Jesus, “Pêtég awud ya hinabi naêñ ya miha ka ya Samaritano ya nahapatan hēn narawak ya a angkahêlêk.” ⁴⁹ “A ko nahapatan hēn narawak ya a angkahêlêk ta muwang ko hēn mam-in galang kan Apo Namalyari, ya Tatang ko. Noa, hikaw, ay a yo ko anggalangên.” ⁵⁰ A ko etaman ampanapol hēn galang yo. Noa, labay ni Apo Namalyari ya hikoy puriên, haka hiyay manatol. ⁵¹ Pakagilamên yo! Hilay manggilam habi ko, ay a matsu makanoman.”

⁵² Nahêñ nahabi nay habayto ay wanlan Israelita kana, “Muwang naêñ amêhêñ ya nahapatan ka hēn narawak ya a angkahêlêk. Natsi ya hi apo Abraham angga hilay mámpamwang ni Apo Namalyari. Noa, panhabiên mo, ya hilay ampanggilam habi mo ay dyanan biyay ya ayn

angga. ⁵³ Makapangyarihan ka kaya kan apo Abraham ya natsi, haka kanlan māmipamwang ni Apo Namalyari ya natsi? Awta! Èndat mo no hino ka?”

⁵⁴ Wani Apo Jesus, “No dayêwên koy sarili ko, ay ayn alagá ya habayto. Ya ampandayêw kangko ay Tatang ko, hi Apo Namalyari. Yabay ya panhabiên yo ya ansimbaên yo. ⁵⁵ A yo yan kilala. Noa, kilala ko ya. No habiên ko ya a ko ya kilala, ay hikoy malarâm hén nanad kamoyu. Noa, kilala ko ya, haka anhonolên koy habi na. ⁵⁶ Hinumigla ya ninuno yo, hi apo Abraham, hén namwangan na ya tungkol ha pamanlumatêng ko di. Hinumigla ya ta muwang na hikoy lumatêng.”

⁵⁷ Wanlan Israelita kana etaman, “Ayn ka pon hén limampoy taon. Nabuyot yay nan natsi hi apo Abraham. Ay-êmén mo yan nahélék?”

⁵⁸ Hinabi ni Apo Jesus, ya wana, “Pakagilamén yo! Bayo ya in-anak hi apo Abraham, ay Hikoy Hikina.” ⁵⁹ Gawan hinabi nay habayto, ay namulot hilan bato, ta batoên la ya dayi. Noa, nipahalimbêng* ya ha pibonakan lan tawo bayro, haka inumawah ya ha Templo hén a la ya namwangan.

9

Namamukat hi Apo Jesus hén mihay buwag

¹ Ha pammita na ay nakahélék hi Apo Jesus hén mihay lalaki ya buwag paubat hén in-anak ya.
² Kabay hinabi lan tagahonol na kana, ya wanla, “Mánoro, hinoy nanyag kasalanan, hata lalaki, o

* ^{8:59} Wanlan kaatag ya labay habiên hén Griego di ay ‘nagtago ya.’

hilay toa na? Awta buwag yay na ubat hēn in-anak ya?”

³ Hinabi ni Apo Jesus, “Ya pangabuwag na, ay alwan gawan kasalanan na, haka alwan gawan kasalanan hēn toa na. Hiyay in-anak hēn buwag ta êmēn ipahlēk kana ya kapangyarihan ni Apo Namalyari. ⁴ Dapat tamon daygēn ya an-ipadyag ni Apo Namalyari, ya namiutoh kangko kaban main pon panaon, ta ustон lumatēng ya nanad yabi, ay ayn kitaminan madyag. ⁵ Kaban atsi ko pon di ha luta, hikoy hawang lan tawo, ta êmēn mahawangan ya kaihipan.”

⁶ Nahēn nahabi nay habayto, ay nandula ya ha luta. Bayo kingwa nay hata luta ta impunih na ha mata hēn buwag. ⁷ Bayo wana kana, “Mita kay na, ta magkulamēh ka do ha lanēm ya pinatangalan Siloe.” Ya labay habiēn hēn Siloe ay in-utoh. Nahēn nadyag hēn buwag ya in-utoh ni Apo Jesus kana, ay nuli ya hēn ampakahēlēk.

⁸ Hilay karani nan bali, haka hilay kaatag hēn kababay na ay naghabi, “Habaytsi awud ya ampi-kno hēn ampakikwan pera.” ⁹ Wanlan kaatag, “Yabay ya.” Noa, wanlan kaatag êt, “Kalupa na yan bat hēn buwag.” Amêhēn, wanlan lalaki, “Hiko ya.” ¹⁰ Kabay wanla kana, “Ay-êmēn nimukat ya mata mo?” ¹¹ Hinabi na, “Ya lalaki, ya nag langan Jesus, ay nanyag hēn pita ta impunih na ha mata ko. Bayo wana kangko, ya magkulamēh ako do ha lanēm ha Siloe. Dinyag koy hinabi na, kabay ampakahēlēk kina.” ¹² Amêhēn, wanla kana, “Anto yay na?” Hinabi na, “A ko muwang.”

*Kinotang lan Pariseo ya lalaki, ya manan buwag
ya ampakahêlêk*

¹³ Gintan lay hatoy lalaki, ya manan buwag ya ampakahêlêk, kanlan Pariseo. ¹⁴ Allon pamagsimba lan Israelita hên nanyag yan pita hi Apo Jesus, haka na pinamukat ya hata lalaki. ¹⁵ Amêhêñ, kinotang la yan Pariseo, no pata ampakahêlêk yay na. Kabay wana kanla, “Namipunih yan pita ha mata ko, bayo hên nagkulamêh ako, ay ampakahêlêk kina.”

¹⁶ Wanlan kaatag ya Pariseo, “Hi Jesus, ay alwan ubat kan Apo Namalyari, ta a na anhonolên ya Kautuhan, ya paan mag-obra ha allon pamagsimba.” Noa, wanlan kaatag, “No makasalanan ya, ay a ya makadyag hên êmbayro ya makapaêpapah.” Alwan mimihay ihip la.

¹⁷ Kabay wanla kanan pinamukat, “Hika bay, ya pinamukat na. Hinoy mahabi mo ya tungkol kana?”

Amêhêñ, wanlan pinamukat, “Hiyay mihay propeta ni Apo Namalyari.” ¹⁸ A hila naniwala ya mana yan buwag, ya pinamukat. Kabay impabaëg lay toa na. ¹⁹ Hinabi la kanla, “Anak yoy hatsi ya buwag hên paubat hiyay in-anak? Ay-êmêñ ta ampakahêlêk yay na amêhêñ?”

²⁰ Hinabi la, “Hiya ya anak naêñ, haka buwag yay na hên in-anak ya. ²¹ Noa, a naêñ muwang, no ay-êmêñ nimukat ya mata na. A naêñ etaman muwang, no hinoy namamukat kana. Kotangêñ yo ya, ta toa yay na. Habiêñ na no hinoy nalyari kana.”

²² Êmbayro ya hinabi lan toa na, gawan malimo hila ha Pariseo. Ta pinihabian lan poon

lan Israelita, ya bawalêñ magsimba ha sinagoga ya hilay ampaghabi, ya hi Apo Jesus, ay hiya ya Mesias, ya Cristo, ya impangakon Mámiligtas ya pinili ni Apo Namalyari hên mamaala. ²³ Gawan namwangan lay pinihabian hên poon la, ay hinabi lan toa na, “Hiya tana ya kotangêñ yo ta toa yay na.”

²⁴ Kabay impabaêg lan oman ya pinamukat haka la hinabi kana, “Purién mo hi Apo Namalyari ta habiêñ moy kaptêgan. Muwang naêñ ya makasalanan ya hi Jesus.”

²⁵ Amêhêñ, wanana pinamukat, “A ko muwang no makasalanan ya. Noa, muwang ko ya mana kon buwag, haka amêhêñ ampakahêlêk kina.”

²⁶ Amêhêñ, hinabi la, “Hinoy dinyag na kamo? Ay-êmêñ nan pinamukat ya mata mo?”

²⁷ Kabay wanana pinamukat, “Hinabi kina kamoyu, noa, a kaw nanggilam. Awta labay yon magilaman oman? Labay yo hên mag-in tagahonol na etaman?”

²⁸ Minusmus la ya, ya wanla, “Hika ya tagahonol na. Noa, hikay ay tagahonol ni apo Moises.

²⁹ Muwang naêñ ya naghabi hi Apo Namalyari kan apo Moises. Noa, a naêñ muwang no ay-iri ya taga hi Jesus.”

³⁰ Wanana pinamukat, “Têh! Pinamukat nay mata ko haka a yo muwang no taga ay-iri ya!

³¹ Muwang tamo ya hi Apo Namalyari ay a na panggilamêñ hilay makasalanan, noa, gilamêñ nay balang ampagsimba kana haka ampanyag kalabayan na. ³² Paubat hên dinyag ya hata luta, ay ayn pon namamukat ha mihay tawo ya buwag

paubat hēn hiyay in-anak. ³³ No hiyay alwan ubat kan Apo Namalyari, ay a na madyag ya kapa-papah.”

³⁴ Amêhēn, hinabi la, “Makasalanan kan in-anak, haka labay mo kay hēn toroan?” Nahēn nahabi lay habayto, ay intaboy la ya ha sinagoga.

Hilay a ampaniwala kan Apo Jesus ay nanad buwag

³⁵ Namwangan ni Apo Jesus ya nalyari ha pinamukat na. Hēn natapol na ya, ay wana kana, “Ampaniwala ka kanan Taga-Langit, ya In-anak Tawo?”

³⁶ Wanana pinamukat, “Hino ya, Apo? Labay ko yan paniwal-an”

³⁷ Wani Apo Jesus, “Angkahêlêk mina, ta hiko ya ampaghabi kamo ay habaytoy Taga-Langit, ya In-anak Tawo.”

³⁸ Wanana pinamukat, “Panginoon, ampaniwala ko kamo!” Nandoko ya haka na sinimba hi Apo Jesus.

³⁹ Hinabi ni Apo Jesus, “Atsi ko ri ha luta ta hatolan koy tawo. Hilay ampangamin ya buwag ya nakêm la, ay makahêlêk hēn kaptêgan. Hilay êndat lan ampakahêlêk hila, ay mabuwag ya nakêm la.”

⁴⁰ Main Pariseo ha dani ni Apo Jesus ya nakagilam hēn habaytoy hinabi na. Kabay wanla, “Yarin buwag ya nakêm naên etaman!” ⁴¹ Hinabi ni Apo Jesus kanla, “No ampangamin kaw dayi ya buwag ya nakêm yo, ay ayn kaw hēn kasalanan. Noa, gawan anhabiên yo ya alwan buwag ya nakêm yo, ay a maalih ya kasalanan yo.”

10

Ya alimbawa ya tungkol ha mihay mangêd ya pastol

¹ Wani Apo Jesus kanlan kal-atan, “Pakagilamên yo! Hilay anhumwên ha koral hên tupa, hên a magdann ha mantêg ilwangan, ay manakaw. ² Ya ampagdann ha mantêg ilwangan, ay mantêg pastol lan tupa. ³ Hilay tanod hên koral hên tupa ay ampanloat hên kabat, ta êmên ya makadann. Muwang lan tupa ya baêg hên maypastol kanla, ta baêgên nay langan la, haka humonol hila kana. ⁴ No naubuh hên na-iawah ya tupa na, ay ampuna ya kanla, haka humonol hila kana, ta muwang lay pamaghabi na. ⁵ A la honolên ya pamaghabi hên kaatag ta muwayu hila, ta a la mapuliah ya pamaghabi hên kaatag.” ⁶ In-alimbawa ni Apo Jesus ya sarili na bayro, noa, a la naintindihan ya labay nan habiên.

Hi Apo Jesus, ya mangêd ya pastol

⁷ Kabay hinabi nan oman kanla, “Pakagilamên yo! Hikoy ilwangan hên koral lan tupa. ⁸ Main nuna kangko ya nanoro hên alwan pêtêg. Hila ay maialimbawa ha mabay manakaw hên tupa. Noa, hilay tupa, ay a nanggilam ha pamaghabi la. ⁹ Hikoy nanad ilwangan. Hilay ampaniwala kangko, haka magdann kangko, ay miligtas. Malyari hilay nan humwên haka umawah, haka la matapol ya kaganawan kailangan la. ¹⁰ Hilay manakaw ay labay lan bat hên manakaw, mamsati, haka manira. Noa, hiko, ay atsi ko di ha luta ta êmên mam-in biyay ya sagana ya ayn pamagkulang.

11 “Hikoy mangêd ya pastol. Ya mangêd ya pastol ay nakal-an hên matsi ha ikakangêd hên tupa na.

12 Hilay an-upaan ya pastol, ay alwan nanad hên mangêd ya pastol, ya ampanlugud ha tupa na. No mahêlêk lay kapalimoy aho, ay lakwanan lay tupa, ta muwayu hila. Kabay patsên nan ahon lalê ya kaatag tupa, haka mipaplag hilay kaatag.

13 Muwayu hilay pastol, gawan an-upaan hilan bêngat. Alwa hila hên nanad ha mangêd ya pastol. A lan anlugurên ya habaytoy tupa, gawan alwan hila ya nag tupa. **14** Hikoy nanad hên mangêd ya pastol. Muwang koy nakêm lan ampaniwala kangko, haka muwang lay nakêm ko. **15** Êmbayro êt, ay muwang na ko ni Apo Namalyari ya Tatang ko, haka êmbayro êt, ay muwang ko ya. Nakal-an ako hên matsi ha ikakangêd lan ampaniwala kangko.

16 Main akon kaatag tupa, ya ayn di ha koral. Gêtan ko hila etaman ta gilamên lay pamaghabi ko. Pilalamoën ko hila ta êmén mag-in mimiha hila, haka kakapag ko ya pastol la.

17 “Anlugurên ako ni Apo Namalyari, ya Tatang ko, gawan nakal-an akon matsi ta êmén ako mabiyay oman. **18** Ayn malyarin mamatsi kangko, no a ko ya paulayan. Nakal-an akon matsi, haka atsi kangkoy kapangyarihan hên mabiyay oman, ta hatsi ya in-utoh kangko ni Apo Namalyari, ya Tatang ko.”

19 Gawan hata habi ni Apo Jesus, ay alwan mimihay ihip lan Israelita. **20** Mal-at kanla ya naghabi, ya wanla, “Hinapatan yan narawak ya a angkahêlêk, haka angkamurit yay na! Awta panggilamên yoy habi na?” **21** Noa, hinabi lan

kaatag, “A ya makahabi hên êmbayro ya mihay hinapatan hên narawak ya a angkahêlêk. A hila makapamukat hên buwag, ya hilay narawak ya a angkahêlêk.”

Hilay poon hên Israelita, ay a ampaniwala kan Apo Jesus

²² Ha balayan Jerusalem hên habayto ay pista hên pamanêmtêm lan Israelita, ha pamanlinis lan ninuno la ha Templo, ya dinêmêkan lan kapatsi la. Panaon hên kêbel hên habayto, ²³ haka hi Apo Jesus ay ampibita-bitia ha pinata-ngalanan Portiko* ni Arin Solomon ha Templo. ²⁴ Amêhêñ, main hên poon lan Israelita, ya nagpalibot kan Apo Jesus, ta dakpêñ la ya dayi ha pamaghabi na. Hinabi la kana, “Mabuyot naêñ nanan labay mamwangan no hino kan taganá. Habién mina dayi ta êmén naêñ maintindihan no hika ya Mesias, ya Cristo, ya pinili ni Apo Namalyari hên mag-in habaytoy Mámiligtas ya impangako na.”

²⁵ Kabay hinabi ni Apo Jesus, “Hinabi kina kamoyu noa, a yo ko paniwal-an. Ya kapapaêpapah ya dyag ko, ya pandaygên ko ha kapangyarihan ni Apo Namalyari, ya Tatang ko, ay ampamaptêg, no hino ko. ²⁶ Noa, a kaw ampaniwala gawan a kaw kalamo ha ampastolan ko. ²⁷ Hilay ampastolan ko, ay nanad tupa ya ampanggilam hên pamaghabi ko. Muwang koy nakêm la, haka anhumonol hila kangko. ²⁸ Dyanan ko hilan biyay ya ayn angga. Antalanêñ koy biyay la, kabay a hila mipalako ha impiyerno haka a hila ma-ayu kangko. ²⁹ Hi

* **10:23** Hêlkên ha panlêkan labay habién hên habi.

Apo Namalyari, ya Tatang ko, ya namipatalan hên biyay la kangko, ay makapangyarihan ha kaganawan kapatsi la. Ayn maka-ayu hên an-illagan na. ³⁰ Hiko, haka hi Apo Namalyari, ya Tatang ko, ay mimiha.”

³¹ Gawan hinabi nay habayto, ay nangwa hilan bato, ta batoêñ la ya dayi. ³² Noa, wani Apo Jesus, “Mal-at ya mangêd ya dinyag ko, ya impadyag na kangko ni Apo Namalyari, ya Tatang ko. Hino ha dinyag ko, ya namaihip kamoyu hên batoêñ ako?” ³³ Kabay wanlan Israelita bayro, “Alwan gawan ha mangêd ya dinyag mo, ya pamatoan naêñ kamo. Noa, labay naêñ kan batoêñ, gawan ha an-ipantag moy sarili mo kan Apo Namalyari. Yarin a mon ammusmusêñ hi Apo Namalyari ya tawo kan bêngat!” ³⁴ Kabay wani Apo Jesus, “Habaytsi ya nakahulat ha Kahulatan ya impahulat ni Apo Namalyari ya tungkol kanlan mánlingon kaso, ‘Hinabi ko, ya hikaw ay diyos.’† ³⁵ Bayro ha impahulat ni Apo Namalyari, ya pêtêg, ay diyos ya pamaêg na kanlan pinatsiwal-an na hên habi na. ³⁶ Anhabien yo ya ammusmusêñ ko hi Apo Namalyari, ya Tatang ko, gawan ha hinabi ko, ya hikoy Anak na! Noa, ayn kaw hên karapatan hên maghabin êmbayro, ta hikoy pinili na, haka in-utoh di ha luta. ³⁷ No a ko ampanyag, hên an-ipadyag na kangko ni Apo Namalyari, ya Tatang ko, ay a yo kailangan hên maniwala kangko. ³⁸ Noa, no pandaygêñ koy an-ipadyag na kangko, awta a yo paniwal-an ya habi ko! Paniwal-an yo tana dayi ya dyag ko, ta êmén yo maintindihan ya atsi

† **10:34** Exodus 22:8-28, Awit 82:6.

kangkoy Tatang ko, hi Apo Namalyari, haka hikoy atsi kana.”

³⁹ Gawan habaytoy hinabi na, ay labay lay na êt dayi hên dakpêñ yan oman. Noa, ayn makadakêp kana. ⁴⁰ Nammita yay na êt hi Apo Jesus, ta lumipay ya ha lanêm ya ampatangalanan lan Illog Jordan ya pinamawtismoan ni Juan Bautista hên una. Naglaêh ya bayro hi Apo Jesus. ⁴¹ Mal-at ya dinumani kana, ta wanla, “A ya nanyag hên kapapaêpapah hi Juan, noa, pêtêg ya balang hinabi na, ya tungkol kanan habaytsi.” ⁴² Mal-at bayro ya naniwala kan Apo Jesus, ya hiyay Mesias, ya Cristo, ya in-utoh ni Apo Namalyari.

11

Hên natsi hi Lazaro, ya kapotoh pohêl lan Marta haka Maria

¹ Main mihay lalaki ya nag langan Lazaro ya ampaidi ha baryon Betania ha probinsyan Judea, ha dani hên balayan Jerusalem. Kalamo na ya kapotoh pohêl na hilan Marta haka hi Maria.* Amêhêñ, nagkahakit hi Lazaro. ² (Hi Maria ya namitugtug hên pabango ha bitsih ni Apo Jesus, haka na punihan hên habot na.) Gawan nagkahakit hi Lazaro, ³ ay impahabi lan Marta haka Maria kan Apo Jesus, ya wanla, “Panginoon, ampaghakit ya anluguran mon kalalaki.”

⁴ Noa, hên nagilam ni Apo Jesus ya impahabi la, ay wana, “A na ikamatsi ya hakit na. Nalyari ya hatsi, ta êmén maipamwang ya kapangyarihan

* **11:1** Lucas 10:38-42, Juan 12:1-3.

ni Apo Namalyari, haka ya kapangyarihan ko, ya Anak na.”

⁵ Anlugurên ni Apo Jesus hilay mitataali ya hi Marta, Maria haka Lazaro. ⁶ Kabay lowa tanay allo na bayro ha Ilog Jordan paubat hên impamwang kana, ya nagkahakit hi Lazaro. ⁷ Amêhêñ, hinabi na kanlan tagahonol na, “Mag-orong kitamina ha probinsyan Judea.”

⁸ Kabay wanla kana, “Mánoro, a pon nabuyot, ay labay la kan batoën, hên patsên, hên hilay poon tamon Israelita bayro. Awta labay mon mag-orong bayro?”

⁹ Kabay wani Apo Jesus kanla, “Main labin-loway oras, hên hawang, ha balang allo. Hilay ampammita no mahawang, ay a mibatol, gawan angkahêlêk lay ampam-in hawang kanlan tawo. ¹⁰ Noa, hilay ampammita ha yabi, ay mibatol gawan ayn hawang kanla.” ¹¹ Nahêñ nahabi nay habayto, ay wana kanla, “Ya kaluguran tamo hi Lazaro, ay nabêlêw. Noa, lakwêñ ko ya, ta pukawêñ ko ya.”

¹² Kabay hinabi lan tagahonol na kana, “Panginoon, no nipakatuloy ya, ay mapanat ya hakit na.”

¹³ Ya labay nan habiêñ ni Apo Jesus, ay natsi yay na hi Lazaro. Noa, a la naintindihan ya labay nan habiêñ, ta êndat la no bêlêw yan taganá hi Lazaro. ¹⁴ Kabay indiretsa nay nan hinabi ni Apo Jesus, “Natsi ya hi Lazaro. ¹⁵ Ha ikakangêd yo, ay mahigla ko, ya ayn ako bayro hên namaalih hên hakit na, ta êmêñ mapahanan ya paniwala yo, ya hikoy Mesias, ya Cristo. Mita kitamina na, ta lakwêñ tamo ya.” ¹⁶ Amêhêñ, wani Tomas,

ya banhagan lan Kambal, “Hali, kihonol kitamo kana, ta êmêñ kitamo matsu hên kalamo na.”

Hi Apo Jesus, ya mamabiyay oman kanlan natsi

¹⁷ Hêñ nilumatêng hilan Apo Jesus ha baryon Betania, ay ika-apatan allo hêñ in-ilbêng ya bangkay ni Lazaro. ¹⁸ Tatloy kilometron bêngat ya dayo hêñ balayan Jerusalem ha baryon Betania. ¹⁹ Kabay mal-at ya Israelita ya taga-Judea ya nilumatêng ta nakidamay kanlan Marta haka Maria gawan natsi ya kapotoh pohêl la.

²⁰ Hêñ nagilam ni Marta, ya anlumatêng hilan Apo Jesus, ay immawah ya, ta nanupa kanla. Noa, hi Maria, ay a inumawah ha bali. ²¹ Wani Marta kan Apo Jesus, “Panginoon, no atsi ka dayi, ay a ya bayton natsi ya kapotoh pohêl ko. ²² Embayro man, ay muwang ko, ya hinoman ya pakikwaan yo kan Apo Namalyari, ay daygêñ na.” ²³ Wani Apo Jesus kana, “Mabiyay yan oman hi Lazaro.” ²⁴ Wani Marta kan Apo Jesus, “Awo, Panginoon. Muwang ko ya mabiyay yan oman ha Allon Pamanukom ya lumatêng ha anggaan hêñ luta.” ²⁵ Amêhêñ, wani Apo Jesus, “Hikoy ampam-in biyay haka hikoy mamabiyay oman kanlan natsi. Hilay ampaniwala kangko, ay mabiyay oman, natsi hila man di ha luta. ²⁶ Hilay ampaniwala kangko, ay dyanan hêñ biyay ya ayn angga. Ampaniwala mo ya habayto, ya hinabi ko?” ²⁷ “Awo, Panginoon,” wani Marta. “Ampaniwala ko ya hika ya Anak ni Apo Namalyari. Hika ya Mesias, ya Cristo, ya pan-êngganan naêñ di ha luta.”

Nanangih hi Apo Jesus

²⁸ Nahêñ nahabi nay na ya habayto ni Marta, ay nuli ya ta binaêg na hi Maria, hêñ in-inanah na kana ya nilumatêng ya Mánoro, haka impabaêg na ya. ²⁹ Ya dinyag ni Maria hêñ nagilam nay habayto, ay tambêng yan nirêng ta nagtagloh ya kana. ³⁰ A ya pon nilumatêng ha balayan hi Apo Jesus, ta atsi ya pon ha logal ya pinakatupaan kana ni Marta. ³¹ Nahêñ nahêlêk lan taga-Judea, ya kalamo ni Maria ha bali hêñ ampakidamay kana, ya bigla yan nammita hi Maria, ay kinamat la ya, ta êndat la no lakwên na ya pinay-ilbêngan hêñ bangkay ni Lazaro, hêñ manangih. ³² Hêñ nilumatêng hi Maria ha ampaidyanan ni Apo Jesus, ay nandoko ya ha arapan na, ta wana, “Panginoon, no atsi ka dayi bayri, ay a ya bayton natsi ya kapotoh pohêl ko.” ³³ Gawan ampanangih hi Maria haka hilay Israelita, ya nangamat kana, ay namalagêhbêg ya nakêm ni Apo Jesus. ³⁴ Hinabi na, “Atoy pinay-ilbêngan yon bangkay na?” Kabay wanla, “Panginoon, kihonol ka kannaêñ ta hêlkêñ mo ya.” ³⁵ Nanangih hi Apo Jesus. ³⁶ Kabay wanlan kaatag Israelita, “Nilugud nan taganá hi Lazaro.” ³⁷ Noa, wanlan kaatag, “Hiya ya namamukat hêñ buwag. Awta pinaulayan na hi Lazaro hêñ matsi?”

Hi Lazaro ay biniyay oman ni Apo Jesus

³⁸ Nahêñ nilumatêng hila ha lêyang, ya pinay-ilbêngan lan bangkay ni Lazaro, ay namalagêhbêg ya nakêm ni Apo Jesus. Main nakapênlan ya bato ha bêbêy lêyang. ³⁹ Kabay wani Apo Jesus, “Al-ihêñ yoy bato.” Noa, wani Marta, “Panginoon, apat ya allo yay nan natsi. Nabatay nay bangkay

na.” ⁴⁰ Wani Apo Jesus kan Marta, “Hinabi kina kamo ya no maniwala ka kangko, ay mahêlêk moy kapangyarihan ni Apo Namalyari.” ⁴¹ Kabay inalíh la ya habaytoy bato ha pinay-ilbêngan la kan Lazaro. Naningla hi Apo Jesus ta wana, “Tatang ko ha langit, ampahalamatan kata, gawan ginilam moy halangin ko. ⁴² Mana kinan muwang, ya panay mon anggilamên ya kaganawan dawat ko. Noa, hinabi koy habayto, ta êmên hila maniwala ya atsi bayri, ya hika ya namiutoh kangko.” ⁴³ Nahêñ nahabi na ya habayto, ay nan-angaw ya, “Lazaro, umawah ka!” ⁴⁴ Inumawah ya. Ya gamêt haka bitsih na ay nakabêlbêl, hên nanad ha ugali la ha natsi. Main panyo ya nakabêlbêl ha ulo na. Amêhêñ, wani Apo Jesus kanla, “Alihêñ yoy nakabêlbêl kana ta êmên ya mibuhan.”

*Ya pamamulong kan Apo Jesus
(Mateo 26:1-5; Marcos 14:1-2; Lucas 22:1-2)*

⁴⁵ Mal-at kanlan Israelita ya taga-Judea, ya nangamat kan Maria, ay nakahêlêk hên biniyay oman hi Lazaro. Kabay naniwala hila kan Apo Jesus ya hiyay Mesias, ya Cristo ya impangakon Mámiligtas ya pinili ni Apo Namalyari hên mamaala. ⁴⁶ Noa, ya kaatag ay nammita, ta hinabi la kanlan Pariseo ya dinyag ni Apo Jesus. ⁴⁷ Kabay namatsipon hilay Pariseo haka hilay ampamaala kanlan pari hên kalamo la ha Sanedrin. Pini-hahabian la no hinoy daygêñ la, gawan hi Apo Jesus ay ampanyag hên mal-at ya kapapaêpapah. ⁴⁸ Hinabi la, “No paulayan tamo ya hên manyag hên êmbayro, ay mal-at ya maniwala ya hiyay Mesias, ya Cristo. Bayo lumatêng hilay hundaloh

hên Roma ta hiraên la ya Templo ni Apo Namalyari, haka bansa tamo.”

⁴⁹ Noa, ya miha kanla, ya hi Caifas, ya pinakapoon pari, ay naghabi, ya wana, “Ayn kaw hên muwang! ⁵⁰ A yo angkaintindihan ya ikakangêd tamo no mimiha tana ya matsi, kanan matsi kitamon kaganawan ha boon bansen Israel.” ⁵¹ Ya habaytoy hinabi ni Caifas, ay alwan ubat ha sarili na, ta habaytoy impapapêt kana ni Apo Namalyari, gawan hiyay pinakapoon pari hên habaytoy taon. Impapêt na ya hi Apo Jesus ay matsi ha ikakangêd lan Israelita, ⁵² haka alwan bêngat ha ikakangêd lan Israelita, noa, ta êmên matsipon etaman ya maának ni Apo Namalyari ya nitatayak ha kaganawan bansa. ⁵³ Paubat hên habayton allo, ay pan-ihipêñ la, no ay-êmên lan mapatsi hi Apo Jesus. ⁵⁴ Kabay a yay na pon nunga ha legal lan Israelita ya mal-at ya tawo. Naglaêh ya tana hên kalamo na hilay tagahonol na ha balayan Efraim, ya atsi ha dani hên legal ya kabalah-balahan.

⁵⁵ Amêhêñ, hên marani yay na êt ya Pistan Pangaligtas ha Egipto,† ay mal-at ya nilumatêng ha balayan Jerusalem, ta honolên lay ugali lan pamaglinis hên sarili la, bayo hila makipista. ⁵⁶ Hêñ a la matapol hi Apo Jesus ha Templo, ay nihahabi hilay tawo ha miha ta miha no makipista ya hi Apo Jesus, o no a ya, ⁵⁷ ta namiutoh hilay ampa-maalaa kanlan pari haka hilay Pariseo, ya no main makahêlêk kan Apo Jesus, ay dapat ipamwang la

† **11:55** Paskwa. Hêlkêñ ha panlêkan labay habiêñ hên habi di ha bokotan hêñ hata Bibliya.

kanla ta êmêñ la ya madakêp.

12

*Hên tinugtugan hên pabango hi Apo Jesus
(Mateo 26:6-13; Marcos 14:3-9)*

¹ Amêhêñ, anêm ya allo bayo mag-umpisa ya Pistan Pangaligtas ha Egipto,* ay nilumatêng hilan Apo Jesus ha baryon Betania ya balayan ni Lazaro, ya biniyay oman ni Apo Jesus. ² Pinanluto hilan Apo Jesus hên maêkan. Namiapag hi Marta. Hi Lazaro etaman, ay miha kanlan ampangan hên kalamo lan Apo Jesus. ³ Hên ampangan hila, ay nangwa hi Maria hên bote hên makamal ya pabango† ta intugtug na ha bitsih ni Apo Jesus. Bayo, pinunihan nan habot na. Hata pabango ay naraêp ha boon bali. ⁴ Hi Judas Iscariote, ya tagahonol ni Apo Jesus ya may-upit kana, ay naghabi, ya wana, ⁵ “Pata a ya inhaliw ya habaytoy pabango, ya ampag-alaga‡ hên suweldo hên mihay katawo ha mihay taon, ta indin dayi ha mangairap ya habaytoy pera?” ⁶ Hinabi nay habayto, alwan gawan ingalo na ha mairap, noa, gawan hiyay ampanalan hên pera lan Apo Jesus, haka antakawêñ nay hatsi ha pansarili na. ⁷ Wani Apo Jesus kan Judas, “Pata an-abalaêñ mo ya! Paulayan mo hi Maria, ta hata dinyag na, ay nanad nan in-il-an ya lawini ko ha pamilbêng kangko no matsi kina. ⁸ Hilay mairap ay panay yon kalamo, kabay ha

* **12:1** Paskwa. Hêlkên ha panlêkan labay habiêñ hên habi di ha bokotan hên hata Bibliya. † **12:3** nardo ha habin Griego.

‡ **12:5** 300 denaryo ha habin Griego.

hinon oras, ay mahawpan yo hila, noa, hiko ay a yo panay hēn mapagkalamo.”

Patsēn la dayi hi Lazaro

⁹ Hēn namwangan hēn kal-atan kanlan Israelita ya taga-Judea, ya atsi ya ha Betania hi Apo Jesus, ay nilako la ya. Labay la êt hēlkēn hi Lazaro, ya biniyay oman ni Apo Jesus. ¹⁰ Labay lan ampa-maala kanlan pari, ya anggan hi Lazaro ya ipap-atsi la, ¹¹ gawan mal-at ya Israelita ya nanalibokot kanla, haka ampaniwala hilay na kan Apo Jesus, gawan ha biniyay nan oman hi Lazaro.

*Mal-at ya ampagpuri kan Apo Jesus hēn ampan-daraho yay na ha balayan Jerusalem
(Mateo 21:1-11; Marcos 11:1-11; Lucas 19:28-40)*

¹² Ha humonoy allo, ay namwangan hēn kal-atan ya nakipista, ya anlumatēng hi Apo Jesus ha Jerusalem. ¹³ Nangwa hilan bulong, ya nanad bulong ongot haka nanupa hila kana. Nipangangaw hila ha panupa la kana, “Hosanna! Ininggalwan ya habaytsi ya in-utoh ni Apo Namalyari! Puriēn hi Apo Jesus ya ampamaala ha Israel!” ¹⁴ Anlumatēng hi Apo Jesus hēn nakahakay ha bisero hēn asno nanad ha nakahulat ha habi ni Apo Namalyari:

¹⁵ “Paan kaw malimo, hikaw ya taga-Jerusalem, § ta anlumatēng ya ampamaala kamoyu, ya nagpakaaypan nakēm hēn himmakay ha bisero hēn asno!”

§ **12:15** anak ya babayi hēn Sion ha habin Griego, Zacarias 9:9.

16 Hêñ habayto ay a la pon muwang hêñ tagahonol ni Apo Jesus ya labay habiêñ hêñ habayto. Noa, hêñ nabiyyay yan oman, ay naihipan la ya hatoy nakahulat, ay tungkol kana, haka nalyari kana.

17 Amêhêñ, hilay kal-atan ya nakahêlêk hêñ biniyyay nan oman ni Apo Jesus hi Lazaro, ay naghabi kanlan kaatag, ya pêtêg ya habayto ya dinyag ni Apo Jesus. **18** Mal-at ya nanupa kan Apo Jesus gawan ha nagilam la, ya biniyyay nan oman hi Lazaro. **19** Kabay wanlan Pariseo ha miha ta miha, “Ayn kitaminan madyag ta naubuh-ubuh hilay nan anhumonol kana.”

Main ungnoy Griego ya nanapol kan Apo Jesus

20 Nakipista êt hêñ magsimba kan Apo Namalyari ya ungnoy Griego. **21** Dinumani hila kan Felipe, ya taga-Betsaida ha probinsyan Galilea. Hinabi la kan Felipe, “Apo, labay naêñ mahêlêk hi Apo Jesus.” **22** Hinabi ni Felipe ya kalabayan la kan Andres. Bayo hinabi lan lowa ya kalabayan lan Griego kan Apo Jesus. **23** Hinabi ni Apo Jesus, “Nilumatêng ya oras ya ipahlêk ya panga-Diyos ko, hêñ Taga-Langit, ya In-anak Tawo. **24** Pakagilamêñ yo, hikoy maialimbawa ha mihay lahí hêñ bini hêñ trigo. No a ya iilbêng ha luta hêñ nanad natsi, ay mimiha na tana. Noa, uston atsi yay na ha luta, ay tumubo ya haka managêy yan mal-at. **25** Hilay ampanlugud hêñ biyay la hêñ igit ha pamanlugud la kan Apo Namalyari, ay maalihan habayto. Noa, hilay ampanlugud kan Apo Namalyari hêñ igit ha biyay la di ha luta, ay main biyay ya ayn angga.

26 Hilay mabay hên maghuyo kangko, ay kailangan hên humonol kangko, ta ya hinon lakwên ko, ay lakwên la etaman. Hilay maghuyo kangko ay itag-ay ni Apo Namalyari, ya Tatang ko.”

Impamwang ni Apo Jesus ya tungkol ha kamatsan na

27 Hinabi na êt ni Apo Jesus, “Angkabyatan ako. Noa, a ko habiên, ‘Tatang, iligtas mo ko ha kairapan ya atsi ha arapan ko.’ A ko mahabi ya habayto, gawan nilumatêng ako di ha luta, ta êmên ko maranasan ya hata kairapan.” **28** Wana êt ni Apo Jesus, “Tatang, ipahlék moy panga-Diyos mo, ta êmên la ka puriên.” Amêhên, wanana habi ya ubat ha langit, “Impahlék kina ya panga-Diyos ko, haka ipahlék kon oman.”

29 Naubuh hilan nakagilam hên hatoy habi. Wanlan kaatag ya nangilat. Wanlan kaatag pon ya main anghel ya naghabi kan Apo Jesus. **30** Wani Apo Jesus, “Habaytoy habi ya nagilam yo ay impagilam ha ikakangêd yo, alwan ha ikakangêd ko.

31 “Gawan nilumatêng ya pamanatol ni Apo Namalyari ha tawo ha luta. Alihên ya tungkulon ni Satanas, ya poon lan a ampagpalokop kan Apo Namalyari. **32** Haka hiko, uston itag-ay ako ha koros, haka mag-orong ha langit, ay ingalwan ko hilay tawo ha balang bansa ta êmên hila makarani kangko.” **33** Hinabi nay habayto ta êmên na ipamwang no ay-êmên yan matsi. **34** Hinabi lan naka-tsipon, ya wanla, “Namwangan naên ha Kahulatan ni Apo Namalyari, ya Mesias, ya Cristo, ya impangakon Mámilitgas ay mabiyay hên ayn

angga. No hika ay habaytoy Taga-Langit, ya In-anak Tawo, ay-êmên mon mahabi ya hika ay matsu ha koros? Hino ya Taga-Langit, ya In-anak Tawo?”
35 Wani Apo Jesus kanla, “Hiko ya maialimbawa ha hawang, ay a magbuyot di kamoyu. Dapat manonol kaw ha intoro ko kamoyu kaban atsi ko pon di. Habayto ay nanad kaw hêñ ampitan allo, ta êmên a kaw mayabyan. No mita kaw hêñ dêmm ay mitama kaw.
36 Kaban atsi ko pon di, ay maniwala kaw kangko ta êmên kaw mag-in tawo ya nahawangan ya kaihipan.”

Hilay Israelita, ay a naniwala ya hi Apo Jesus, ay hiyay Cristo

Pamakahabi nan habayto, ay nammita ya haka a yay na nagpahlêk kanla.
37 Agyan kal-atan ya kapapaêpapah ya dinyag na ha arapan la, ay malat pon êt kanla ya a naniwala ya hiyay Cristo.
38 Nalyari ya habayto ta êmên matupad ya impamwang ni Propeta Isaias, ya wana:

“Panginoon, ayn naniwala ha impamwang naêñ.
 Ayn naniwala agyan impahêlêk minay ka-pangyarihan mo kanla.”*

39 A hila malyarin maniwala, ta nanad êt ha hinabi ni Propeta Isaias, ya wana:

40 “Binuwag ni Apo Namalyari ya ihip la, ta êmên la a maintindihan, haka pinakdêy na êt ya nakêm la. Dinyag nay habayto ta êmên hila a maghêhê hêñ dumani kana, haka ta êmên a na hila iumang kana.”†

* **12:38** Isaias 53:1. † **12:40** Isaias 6:10.

41 Hinabi nay habayto ni Propeta Isaias gawan impahalumata kana ya panga-Diyos ni Apo Jesus. Haka naghabi yan tungkol kana.

42 Êmbayro man, ay mal-at kanlan ampamaala kanlan Israelita ya naniwala ya hi Apo Jesus, ay hiyay Cristo. Noa, gawan malimo hila kanlan Pariseo, ay a la impamwang kanlan kaatag, ta kayno bawalan hila hêñ makilamo ha kapareho lan Israelita ha sinagoga. **43** Nalabayan la awud ya pamandayêw hêñ tawo kanan pamandayêw ni Apo Namalyari.

Ya impamwang ni Apo Jesus ay impahabi kana ni Apo Namalyari

44 Amêhêñ, nanoro yay na êt hi Apo Jesus ha kal-atan. In-ikhaw nay pamaghabi na, ya wana, “Hilay ampaniwala kangko, ay ampaniwala etaman kan Apo Namalyari ya namiutoh kangko.

45 Hilay nakahêlêk kangko ay nakahêlêk kan Apo Namalyari, ya namiutoh kangko. **46** Nilumatêng ako di ha luta hêñ nanad ha hawang, ta êmêñ hilay maniwala kangko ay ahina paidi ha kariglêman.

47 Hatolan hilay a naniwala ha nagilam lay habiko, noa, alwan hiko ya manatol kanla, ta a ko nilumatêng di hêñ parusaan ya hinoman. Noa, nilumatêng ako di ta êmêñ iligtas hila. **48** Hilay ampangara kangko, haka a ampaniwala ha habiko ay maparusaan. Ya habi ya impamwang ko ay mamarusa kanla ha anggaan hêñ luta. **49** Ta a ko naghabi ha sarili kon tungkulon, noa, ya Tatang ko hi Apo Namalyari ya namiutoh kangko ay namihabi kangko no hinoy habiêñ ko. **50** Muwang ko ya utoh na, ay mam-in biyay hêñ ayn angga

hēn kalamo na, ha ampaniwala kana. Kabay ya impahabi na kangko ay anhabién ko.”

13

Inuyahan ni Apo Jesus ya bitsih lan tagahonol na

¹ Nilumatêng ya yabi hēn bayo mag Pistan Pangaligtas. Muwang ni Apo Jesus ya nilumatêng ya panaon hēn pamag-alíh na di ha luta, ta êmên ya mag-orong kan Apo Namalyari, ya Tatang na. Anlugurén na hilay tagahonol na, ya atsi di ha luta. Haka an-ipahlék na, no ay-êmên ya pamanlugud na kanla hēn angga ha anggaan.

² Kaban ampangan hi Apo Jesus hēn kalamo lan tagahonol na, ay naipaihip ni Satanas kan Judas, ya anak ni Simon, ya taga-Iscariote, ya ipulong na hi Apo Jesus. ³ Muwang nay na ni Apo Jesus ya inubuh hēn indin kana ni Apo Namalyari, ya Tatang na, ya kaganawan kapangyarihan. Muwang na êt, ya ubat ya kan Apo Namalyari, haka mag-orong yay na kana. ⁴ Kabay haton ampangan hila ay nirêng ya hi Apo Jesus, ta nag-alíh ya hēn pangkêbel na, bayo pintêh na ya awak na hēn makarang ya tuwalya. ⁵ Nanad andaygén lan ipoh, ay nangwa yan lanêm, ta indin na ha palanggana, haka na inuyahan ya bitsih lan tagahonol na. Bayo pinunihan na hēn tuwalya ya nakaptêh ha awak na.

⁶ Hēn dinumani ya kan Pedro, ay wani Pedro, “Awkêh! Pata hika pon, Panginoon, ya manguyah hēn bitsih ko?”

⁷ Hinabi ni Apo Jesus, “A mo maintindihan amêhên, ya andaygên ko, noa, maintindihan mina lano.”

⁸ Hinabi kana ni Pedro, “Panginoon, taganán a ko ipauyah ya bitsih ko kamo.” Amêhên, wani Apo Jesus, “No a kata uyahan, ay ayn kan pamakilamo kangko.”

⁹ Kabay hinabi ni Pedro, “Panginoon, no êmbayro awud, ay alwan bêngat hên bitsih ko ya ipauyah ko kamo, noa, gamêt ko, haka ulo ko etaman.”

¹⁰ Hinabi ni Apo Jesus, “No nagpalyuy nay mi-hay tawo, ay a nay nan kailangan hên magpalyu hên oman ta malinis yay na. Bitsih na tana ya uyahan na. Noa, main miha kamoyu ya alwan malinis.” ¹¹ (Hinabi nay êmbayro ni Apo Jesus, ta muwang na no hino ya mangi-upit kana.)

¹² Hêñ nauyahan ni Apo Jesus ya bitsih la, ay inhulod nay na êt ya pangkêbel na. Nag-orong yay na ha panganan, ta kinotang na hila, no naintindihan la ya dinyag na kanla, ya wana, ¹³ “Ambaêgên yo ko hêñ Mânoro, haka Panginoon. Pêtêg ya anhabîen yo ta hikoy habayto. ¹⁴ No hiko, ya Panginoon yo, haka Mânoro yo, ya nanguyah hêñ bitsih yo, hikaw etaman êt ya kailangan manguyah hêñ bitsih hêñ miha ta miha. ¹⁵ Dinyanan kataw hêñ alimbawa ta êmên yo ko tuwarêñ. ¹⁶ Pakagilamêñ yo! Ya tungkulán hêñ mihay ipoh ay alwan matag-ay ha tungkulán hêñ amo na. Haka hatoy in-utoh, ay alwan matag-ay ya tungkulán ha nay-utoh kana. ¹⁷ No angkaintindihan yo, ya hata anhabîen ko kamoyu, ta daygên yo, ay ingalwan kaw ni Apo Namalyari.

18 “Alwan kaganawan yo ya ingalwan, ta muwang koy nakêm hêñ pinili ko. Noa, kailangan matupad ya habi ha Kahulatan ni Apo Namalyari, ya wana, ‘Hikoy in-upit hêñ kaaêm ko.’* **19** Anhabién ko ya hatsi kamoyu, bayo ya malyari, ta êmén no malyari yay na, ay maniwala kaw ya ‘Hikoy Hiko taganá.’ **20** Pakagilamên yo. Hilay ampananggap ha in-utoh ko, ay hiko êt ya antanggapên la. Haka hilay ampananggap kangko, ay ampananggap ha namiutoh kangko.”

*Inungkat ni Apo Jesus ya pamí-upit kana
(Mateo 26:20-25; Marcos 14:17-21; Lucas 22:21-23)*

21 Pangahabi nan habayto, ay namalagêhbêg ya nakêm na. Bayo wana kanla, “Pakagilamên yo! Miha kamoyu ya mangi-upit kangko.” **22** Amêhêñ, nihêhêlêk hila ya tagahonol na, ta a la muwang no hinoy an-ungkatêñ na. **23** Ya tagahonol na, ya banhagan lan anlugurêñ ni Apo Jesus, ay atsi ha dani na. **24** Kabay siningyalan ya ni Simon Pedro, ya ikotang na, no hinoy an-ungkatêñ na ya may-upit kana. **25** Kabay dinumani ya kan Apo Jesus, hêñ indani nay ulo na ha pagaw na, ta wana, “Panginoon, hinoy may-upit kamo?” **26** Hinabi ni Apo Jesus, “Ya dyanan ko hêñ puto ya ubat kon intsil-tsил, ay hiya ya may-upit kangko.” Kabay nangwa yan puto, haka ubat nan intsil-tsил, ay indin na kan Judas ya anak ni Simon Iscariote. **27** Hêñ kingwa ni Judas ya puto, ay hinuloran ya ni Satanas. Hinabi ni Apo Jesus kan Judas, “Daygêñ mina ya labay mon daygêñ.” **28** Noa, miha

* **13:18** Awit 41:9.

man kanla ha kaaêm na, ay ayn nakamwang no awta nahabi nay habayto. ²⁹ Gawan hi Judas, ya magkatalan hên pera la, êndat la no pinahaliw yan bêngat ni Apo Jesus hên kailangan la ha pista, o no in-utoh na ya hên mam-i hên pera ha mangairap. ³⁰ Hêñ naêkan nay na ni Judas ya puto, ay nammita yay na. Nariglêm hên habayto.

Ya bayon utoh

³¹ Hêñ nammita yay na hi Judas, wani Apo Jesus, “Ya malyari laamêhêñ, kangkon Taga-Langit, ya In-anak Tawo, ay mamipahlêk hên panga-Diyos ko, haka mam-in pamagpuri kan Apo Namalyari. ³² Haka no mapuri yay na hi Apo Namalyari gawan kangko, ay tampol nan ipahlêk ya panga-Diyos ko. ³³ Maanak ko, naipêk tanay panaon hên makalamo yo ko. Tapolêñ yo ko, noa, anhabien ko kamoyu, hêñ nanad ha hinabi kina kanlan poon lan Israelita, ya a kaw makapakilako ha anlakwêñ ko. ³⁴ Habaytsi ay mihay bayoy utoh ya an-idin ko kamoyu. Milulugud kaw! No ay-êmén kataw hêñ anlugarûñ ay, êmén êt bayro ya pamilulugud yo. ³⁵ No ampilulugud kaw, ay mamwangan hêñ kaltatan, ya hikaw ay tagahonol ko.”

Impamwang ni Apo Jesus ya habiên ni Simon Pedro ya a na ya muwang

(Mateo 26:31-35; Marcos 14:27-31; Lucas 22:31-34)

³⁶ Amêhêñ, wani Simon Pedro kan Apo Jesus, “Apo, antoy lakwêñ mo?” Kabay wani Apo Jesus, “Ha anlakwêñ ko, a ka pon makapakilako amêhêñ, noa, humonol ka tana lano.” ³⁷ Wanay na êt ni Pedro, “Panginoon, pata a ko pon makapakihonol

kamo amêhêñ? Nakal-an akon matsi ha ikakangêd mo.” ³⁸ Wani Apo Jesus, “Yarin nakal-an ka hêñ matsi ha ikangêd ko! Pakagilamêñ mo. Bayo mangkatsi ya manok, ay katatlo mon habiêñ, ya a mo ko muwang.”

14

Hi Apo Jesus ya dann ya palako ha Tatang na ha langit

¹ Wanay na êt ni Apo Jesus, “Paan kaw mam-potog. Ihundo yoy paniwala yo kan Apo Namalyari haka maniwala kaw etaman kangko. ² Ha langit ha ampaidyanan hêñ Tatang ko, ay malat ya paidyanan. No alwan pêtêg ya habayto, ay yarin habiêñ koy êmbayro? Muna kina bayro, ta il-an koy paidyanan yo. ³ No atsi kina bayro, haka no nail-an kina ya paidyanan yo, ay mag-orong kina, ta gêtan kataw bayro ha ampaidyanan ko. ⁴ Muwang yoy na bayto, ya dann ya palako do ha anlakwêñ ko.” ⁵ Amêhêñ, hinabi kana ni Tomas, “Panginoon, a naêñ muwang ya lakwêñ mo, ay êmêñ naêñ mamwangan ya dann?” ⁶ Kabay hinabi ni Apo Jesus, “Hiko ya dann ya palako kan Apo Namalyari, ya Tatang ha langit. Hiko ya ampamipamwang hêñ kaptêgan ya tungkol kana, haka hiko ya ampam-in biyay ya ayn angga. Ayn midani kana, no a ya magdann kangko. ⁷ No muwang yo no hino kon taganá, ay kilala yo etaman ya Tatang ko. Paubat amêhêñ, ay kilala yo yay na, haka nanad nahêlêk yo yay na.”

⁸ Amêhêñ, hinabi kana ni Felipe, “Panginoon, ipahlêk mo kannaêñ ya Tatang mo. Bayo ayn

kay kaatag ya tapolên.” ⁹ Kabay wani Apo Jesus, “Felipe, nabuyot yo kinan kalamo. Angga amêhên, ay a mo ko pon kilala? No nahêlêk yo ko, ay nahêlêk yoy nay Tatang ko. Pata hinabi mo ya ipahlêk ko kamo ya Tatang ko? ¹⁰ Yarin a ka ampaniwala, ya mimiha kay ni Tatang? Hiko ay atsi kana, haka hiya ay atsi kangko. Ya anhabiên ko, ay angkaubat kana alwan ha sarili ko. Embayro etaman ya kaganawan dyag ko, ay angkaubat kana. ¹¹ Maniwala kaw ha hinabi ko ya atsi ko ha Tatang ko, haka ya Tatang ko ay atsi kangko. No a kaw maniwala ha anhabiên ko, maniwala kaw tana, gawan ha kapapaêpapah ya andaygên ko. ¹² Anhabiên ko kamoyu, ya hinon ampanlugud kangko, ay makadyag etaman hên andaygên ko, haka mal-at pon di, ta mag-orong kina ha Tatang ko. ¹³ Ya hinon pakikwaan yo kan Tatang, gawan ha pakikimiha yo kangko, ay daygên ko ta êmên mapuri hi Tatang, gawan kangko, ya Anak. ¹⁴ Ya hinon pakikwaan yo kangko gawan ha pakikim-ihia yo kangko, ay daygên ko.”

Impangako ni Apo Jesus ya dyanan hila hên Espiritu ni Apo Namalyari

¹⁵ “No anlugurên yo ko, tuparêñ yoy an-iutoh ko kamoyu. ¹⁶ Haka makidawat ako kan Apo Namalyari, ya Tatang ko, ya dyanan na kaw hên miha pon ya Kahawop yo, ya makalamo yo hên ayn angga. ¹⁷ Yabay ya Espiritu ni Apo Namalyari ya an-ipamwang hên kaptêgan. Hiya ay a matanggap lan a ampagpalokop kan Apo Namalyari, gawan a la ya angkahêlêk, haka a la ya angkabalayan. Noa,

balay yo ya, ta atsi ya kamoyu, haka lumatêng ya allo, ay humapat ya kamoyu.

18 “A kataw ibalag hên nanad ha olila ta mag-orong ako kamoyu. **19** A mabuyot ay, a la kina mahêlêk lan a ampagpalokop kan Apo Namalyari. Noa, hikaw, ay mahêlêk yo ko. Gawan mabiyay kon oman, ay mabiyay kaw etaman. **20** Kanan habayto, ay mamwangan yo ya hiko, ay main pakikimiha ha Tatang ko, haka hikaw etaman ay main pakikimiha kangko, haka hiko ay main pakikimiha kamoyu.

21 “Hilay am panggilam haka ampanupad hên utoh ko, ay ampanlugud kangko. Hilay ampanlugud kangko, ay lugurên hên Tatang ko. Lugurên ko hila êt, haka ipamwang ko kanla, ya tungkol kangko.” **22** Kabay hinabi ni Judas (alwan Judas Iscariote), “Panginoon, awta kannaên kan bêngat magpabalay? Awta a mo ipamwang ya tungkol kamo kanlan kaganawan tawo ha luta?”

23 Naghabi hi Apo Jesus, “Hilay ampanlugud kangko, ay manyag hên anhabiên ko. Lugurên hila hên Tatang ko, haka humapat kay kanla. **24** Hilay a ampanlugud kangko, ay a hila etaman manyag hên anhabiên ko. Ya anhabiên ko kamoyu, ay angkaubat kan Apo Namalyari, ya Tatang ko, ya nay-utoh kangko.”

25 “Habaytoy hinabi kina kamoyu kaban kalamo yo ko pon. **26** Noa, lano, ay mamiutoh hi Apo Namalyari, ya Tatang ko, hên Espiritu na, ya mag-in Kahawop yo. Hiyay mamihundo hên panoro ko kamoyu hên kaganawan, haka hiya ya maypaihip kamoyu hên kaganawan intoro ko

kamoyu.”

²⁷ “Paan kaw manyagah. Paan kaw malimo. Ta patêkbékén koy ihip yo. Ya kapatékbékan ya an-idin ko kamoyu, ay pêtêg ya kapatékbékan. Habayto ay alwan nanad ha kapatékbékan ya anungkatén lan tawo di ha luta. ²⁸ Nagilam yoy hinabi ko kamoyu ya hikoy mag-alih. Haka mag-orong ako kamoyu. No anlugarén yo ko dayi, ay ikahigla yo dayi ya pag-orong ko kan Apo Namalyari, ya Tatang ko, ta daêg na ko gawan ya tungkulan na ay matag-ay ha tungkulan ko. ²⁹ Anhabién kina kamoyu ya hatsi bayo malyari, ta êmén no malyari ya, ay maniwala kaw, ya pêtêg ya hinabi ko. ³⁰ A kina pakakarangén ya pamaghabi ko kamoyu, ta anlumatêng hi Satanas, ya poon lan a ampagpalokop kan Apo Namalyari. Ayn yan kapangyarihan kangko. ³¹ Êmbayro man, ta êmén mamwangan hên balang miha, ya anlugarén ko ya Tatang ko, hi Apo Namalyari, ay andaygén ko ya hatoy an-iutoh na kangko. Hali awud, mita kitamina.”

15

In-alimbawa ni Apo Jesus ya sarili na ha mihay poon ubas

¹ Kaban ampammita hila, ay wani Apo Jesus kanlan tagahonol na, “Hiko ya mantêg hên poon ubas, haka ya Tatang ko, hi Apo Namalyari, ya ampanayhay hên ubasan. ² Ampotohén na hilay hanga ko ya ayn tagêy, haka anlinisan na hilay hanga ya main tagêy, ta êmén lalo hilan managêy. ³ Nilinisan kaw na gawan ha paniwala yo ha

hinabi ko kamoyu. ⁴ Ihundo yoy pakikimiha yo kangko, haka hiko man, ay ihundo koy pakikimiha ko kamoyu. A ya managéy ya hanga hén ubas, no a ya nakatumpang ha poon. Êmbayro êt kamoyu, no a yo ihundo ya pakikimiha yo kangko.”

⁵ Bayo inoman nan inungkat ya alimbawa na, ya wana, “Hiko ya poon hén ubas haka hikaw ya hanga. Hilay ampamihundo hén pakikimiha la kangko, ta êmén ako etaman magkamain pakikimiha kanla, ay hilay nanad ha hanga ya managéy hén bapan laké, gawan ayn kaw madyag, no hikaw ay nakapapawa kangko. ⁶ Hilay a ampamihundo hén pakikimiha la kangko, ay nanad hilan hanga ya itapon. No mayango ya êmbayroy hanga, ay tsiponén hila tana, ta ulamén. ⁷ Noa, no ihundo yo ya pakikimiha yo kangko, haka no maglaêh ha nakém yo ya habi ko, ay pakikwaan yo ya hinoman ya labay yo kan Apo Namalyari, ta idin na kamoyu. ⁸ Angkapuri ya Tatang ko no hikaw ay ampanagéy hén bapan laké, haka angkapaptégan hén hikaw ay tagahonol ko. ⁹ No ay-êmén ya pamanlugud na kangko hén Tatang ko, ay êmbayro êt ya pamanlugud ko kamoyu. Ihundo yoy pakikimiha yo kangko, ta ha êmbayro ay panay yon mapakinabangnan ya pamanlugud ko. ¹⁰ No anhonolén yoy utoh ko, ay mapakinabangnan yoy pamanlugud ko kamoyu. Nanad kangko, anhonolén ko êt ya kaganawan utoh ni Apo Namalyari, ya Tatang ko, haka panay kon pakinabangnan ya pamanlugud na.”

¹¹ “Hinabi koy habayto kamoyu, ta êmén kaw

milamo ha hadayay kahiglaan ko. ¹² Habaytsi ya utoh ko kamoyu ya milulugud kaw hēn nanad hēn pamanlugud ko kamoyu. ¹³ Ayn pamanlugud ya igit ha pamanlugud hēn mihay lalaki, ya ihalanggo nay biyay na kanlan kaluguran na. ¹⁴ Hikaw ay kaluguran ko, no anhonolēn yoy an-iutoh ko. ¹⁵ A kataw nan baēgēn tagahuyo, ta a na muwang hēn tagahuyo, ya andaygēn hēn amo na. Noa, binaēg kataw hēn kaluguran ko, ta hinabi kina kamoyu ya kaganawan ya nagilam ko kan Apo Namalyari, ya Tatang ko. ¹⁶ Alwan hikaw ya namili kangko, ta hiko ya namili kamoyu. In-utoh kataw hēn maypamwang hēn habi ni Apo Namalyari, ya Tatang ko, ta êmēn mal-at ya maniwala, haka hilay nanad ayn anggay tagēy hēn paniwala yo. Ta no daygēn yoy habayto, ay idin na kamoyu ya hinon pakikwaan yo, gawan ha pakikimiha yo kangko. ¹⁷ Habaytsi ya an-ioman kon iutoh kamoyu, ya milulugud kaw.”*

Angkahēmēkan hilay anhumonol kan Apo Jesus

¹⁸ Wanay na êt ni Apo Jesus, “No angkahēmēkan la kaw lan a ampagpalokop kan Apo Namalyari, ay ihipēn yo ya bayo la kaw kinahēmēkan, hiko pon ya kinahēmēkan la. ¹⁹ No alimbawa ta tuwarēn yoy ugali la, ay lugurēn la kaw. Noa, a yo hila antuwarēn, ta pinili kataw na hēn mag-in tagahonol ko. Kabay angkahēmēkan la kaw. ²⁰ Pakaihipēn yo ya hinabi ko kamoyu, ya tungkulan hēn mihay ipoh ay alwan matag-ay ha tungkulan hēn amo na.† Pinairapan la ko, haka pairapan

* **15:17** Juan 15:12. † **15:20** 13:16.

la kaw. No hinonol lay hinabi ko, ay honolên lay panhabiên yo. ²¹ Daygên lay hatsi kamoyu gawan ha pakikimiha yo kangko ta a la kilala hi Apo Namalyari, ya nay-utoh kangko. ²² No a ko dayi nilumatêng di ha luta hên nanoro kanla, ay mahabi la ya a la muwang ya kasalanan awud ya andaygên la. Noa, amêhên, a lay na mahabi ya a la muwang ya kasalanan ya andaygên la, ta tinoroan ko hilay na. ²³ Hilay anhumêmêk kangko, ay anhumêmêk etaman kan Apo Namalyari, ya Tatang ko. ²⁴ Nanyag akon kapapaêpapah ha arapan la, ya a pon nadyag hên hinoman, kabay a lay na mahabi ya alwan kasalanan, ya hila ay a ampaniwala kangko. Nahêlêk la man ya kaganawan dinyag ko, ay angkahêmêkan la ko, haka angkahêmêkan la hi Apo Namalyari, ya Tatang ko. ²⁵ Noa, êmên din taganá, gawan natupad ya impahulat ni Apo Namalyari ha Kahulatan na, ya wana, ‘Bat la kon kinahêmêkan.’ ”†

²⁶ Hinabi na êt ni Apo Jesus, ya wana, “Lumatêng ya allo, ay iutoh ko kamoyu ya Kahawop yo, ya Espiritu hên kaptêgan, ya ubat kan Apo Namalyari, ya Tatang ko. Hiya ya mamaptêg hên tungkol kangko. ²⁷ Hikaw êt ya mamaptêg ha kaganawan dinyag ko, ta paubat hên una, ay kalamo kataw na.”

16

¹ Hinabi nay na êt ni Apo Jesus, ya wana, “Manakinan hinabi ya habayto kamoyu, ta êmên yo ihundo ya paniwala yo kangko. ² Paalihêñ la kaw ha sinagoga yo. Lumatêng ya panaon ay main

† ^{15:25} Awit 35:19 haka Awit 69:4.

mamatsi kamoyu, ta êndat la no ampaghuyo hila kan Apo Namalyari no patsêñ la kaw.³ Daygêñ lay habayto ta a la nabalayan hi Apo Namalyari, ya Tatang ko, haka a la ko nabalayan.⁴ Mana kinan anhabiêñ ya habayto kamoyu, ta no lumatêng ya allo, ya daygêñ lay habayto kamoyu, maihipan yo ya nagilam yo kangko.”

Ya Espiritu ni Apo Namalyari ya maypalinaw hên in-toro ni Apo Jesu-Cristo

Hinabi nay na êt ni Apo Jesus, ya wana, “A ko pon hinabi ya habaytsi kamoyu, ta kalamo yo ko pon.⁵ Noa, habiêñ kina, ta mag-orong kina kan Apo Namalyari, ya Tatang ko, ya nay-utoh kangko. Ayn man kamoyu hên ampangotang kangko no antoy lakwêñ ko.⁶ Noa, haday lungkot yo tana gawan hinabi kina kamoyu ya habayto.⁷ Embayro man, ay dapat yon mamwangan ya kaptêgan. Ya pamag-alíh ko, ay ha ikakangêd yo, ta a ya lumatêng di kamoyu ya Espiritu ni Apo Namalyari, ya Kahawop yo, no a ko mag-alíh. No atsi kina bayro kan Apo Namalyari ay iutoh ko yay na kamoyu.⁸ Ha pamanlumatêng na, ay ipaihip na kanlan a ampagpalokop kan Apo Namalyari, ya alwan usto ya an-ihipêñ la tungkol ha kasalanan, haka tungkol ha katoynungan, haka tungkol ha pamanatol ni Apo Namalyari.⁹ Mamwangan la ya makasalanan hila, gawan a hila naniwala ya hikoy Anak na.¹⁰ Mamwangan la ya hikoy makan-toynungan, ta mag-orong kina kana, ya Tatang ko. Bayo a yo kinan mahêlêk.¹¹ Mamwangan la ya lingonêñ hilan parusaan, gawan hinatolan

yay na hēn parusaan hi Satanas, ya poon lan a ampagpalokop kan Apo Namalyari.”

¹² “Mal-at pon dayi ya habiēn ko kamoyu. Noa, a pon agyu hēn ihip yo amêhēn. ¹³ Panlumatêng hēn Espiritu ni Apo Namalyari, ya ubatan hēn kaganawan kaptēgan, ipamwang na kamoyu ya boon kaptēgan, ta a ya mag-habi ha sarili nan ihip, noa, ya habiēn nan bēngat, ay hatoy nagilam na kan Apo Namalyari. Haka ipamwang na êt kamoyu ya a pon nalyari. ¹⁴ Ipahlék na ya pangadiyos ko, haka ipamwang na kamoyu ya laman ihip ko. ¹⁵ Ya laman ihip ni Apo Namalyari, ya Tatang ko, ay habayto êt ya laman ihip ko, kabay hinabi ko ya laman ihip ko, ya ipamwang na kamoyu.”

Ya kalungkutan ay hagilyan hēn kahiglaan

¹⁶ Hinabi nay na êt ni Apo Jesus kanlan tagahonol na, ya wana, “A mabuyot, ay a yo kina mahêlêk. Bayo, a mabuyot, mahêlêk yo kon oman.”

¹⁷ Nihahabi hilay nay tagahonol na, ya wanla, “Hino raw ya labay nan habiēn? Pata hinabi nay a mabuyot, ay a tamo yay nan mahêlêk, bayo a mabuyot, ay mahêlêk tamo yay na êt. Haka wana êt ya, lakwēn na hi Apo Namalyari, ya Tatang na. ¹⁸ Hinoy labay habiēn, hēn hinabi na ya a mabuyot? A tamo muwang no hino ya labay nan habiēn.”

¹⁹ Namwangan ni Apo Jesus ya labay lan kotangēn, kabay hinabi nay na kanla, ya wana, “Ampangotang kaw ha hinabi ko ya a mabuyot ay a yo kinan mahêlêk, bayo a mabuyot ay mahêlêk

yo kina êt. ²⁰ Pakagilamên yo. Manangih kaw haka manyêngêñ kaw. Noa, hilay a ampagpalokop kan Apo Namalyari ay humigla. Hikaw ay maglungkot pon, noa, ya kalungkutan yo ay hagilyan hêñ kahiglaan.

²¹ “Habayto ay nanad ha mihay babayi, no angkatanam nay na ya manganak ya, ay ampaglunkot ya pon, ta nilumatêng ya oras hêñ kairapan na. Noa, no na-ianak nay na, ay a nay nan maihipan ya kairapan, gawan kahiglaan na ha anak na. ²² Êmêñ kaw êt bayro. Ampaglunkot kaw amêhêñ, bayo no mahêlêk yo kon oman, ay humigla kaw hêñ taganá. Ya kahiglaan yo ay a maayu hêñ hinoman.

²³ “A yoy nan kailangan hêñ mangotâng hêñ hinoman kangko ha alloy habayto. Pakagilamên yo, ya hinoman ya pakikwaan yo kan Apo Namalyari, ya Tatang ko, ay idin na gawan ha pakikimiha yo kangko. ²⁴ Angga amêhêñ, ay ayn kaw pon pinakikwaan kana gawan ha pakikimiha yo kangko. Noa, amêhêñ, ay panay kaw dayi hêñ kikwa, ta dyanan na kaw, ta êmêñ kaw magkamain hêñ hadyay kahiglaan.”

Hinambut ni Apo Jesus ya nangarawak

²⁵ Inhundo ni Apo Jesus ya pamaghabi na, ya wana, “Habaytoy hinabi ko kamoyu hêñ paalimbawa. Noa, lumatêng ya panaon, ay a kinan maghabi kamoyu hêñ paalimbawa, ta ipakapuliah kinan habiêñ kamoyu ya tungkol kan Apo Namalyari, ya Tatang ko. ²⁶ Ha alloy habayto, ay makikwa kaw kana, gawan ha pakikimiha yo kangko. A ko anhabiêñ kamoyu ya pakikwa

kataw hēn hinoman kana, ²⁷ gawan hiyan taganá ya ampanlugud kamoyu. Anlugurēn na kaw gawan anlugurēn yo ko haka ampaniwala kaw ya hiko ay ubat kana. ²⁸ Hiya ya ubatan ko hēn nilumatēng ako di ha luta. Haka mag-orong kina kana.” ²⁹ Hēn nagilam lay habayto hēn hilay tagahonol na, ay wanla, “Awo, Panginoon. Amêhēn, angkaintindihan naēn ya anhabiēn mo, ta impakapuliah mina. Alway nan paalimbawa ya anhabiēn mo. ³⁰ Amêhēn, ay muwang naēn ya muwang moy balang hino. Muwang moy kotang ya atsi ha ihip hēn balang tawo. Kabay ampaniwala kay, ya hika ay ubat kan Apo Namalyari.” ³¹ Wani Apo Jesus, “Awo, ampaniwala kaw na amêhēn. ³² Noa, ihipēn yoy habaytsi. Marani yanay oras ya mapitatayak kaw. Ibalag yo ko, ta muli kaw ha bali yo. Êmbayro man, kalamo ko hi Apo Namalyari, ya Tatang ko. ³³ Hinabi kina kamoyu ya habayto, ta êmēn kaw magkamain kapatêkbékan hēn ihip gawan ha pakikimiha yo kangko. Êmbayro man, ay main kaw pon hēn kairapan di ha luta. Noa, pakataniêhēn yoy nakêm yo, ta hinambut kinay nangarawak di ha luta.”

17

Nanalangin hi Apo Jesus

¹ Hēn nahabi nay na ni Apo Jesus, ya habayto, ay naningla ya ha langit ta wana, “Tatang, nilumatēng ya oras. Ipahlēk minay panga-Diyos ko, ya Anak mo, ta êmēn ko ipahlēk ya panga-Diyos mo etaman. ² Ta indin mo kangko ya tungkulán hēn mamaala ha balang miha, ta êmēn

hila dyanan biyay ya ayn angga ya impatsiwala mo kangko. ³ Habaytsi ya biyay ya ayn angga, ya makilala la ka, ya kamiha-mihaan Diyos, haka mamwangan la ko, hi Apo Jesu-Cristo ya in-utoh mo. ⁴ Impahlék koy panga-Diyos mo di ha luta ta nayari kina ya impadyag mo kangko. ⁵ Amêhén, Tatang, ha arapan mo, ay ipahlék mo dayi ya panga-Diyos ko, ya atsi kangko hên kalamo kata haton bayo êt dinyag ya hata luta.

⁶ “Impabalay kata kanlan impatsiwala mo kangko, ya hilay pinili mo ha kal-atan tawo ha luta. Kamo hila, bayo impatsiwala mo hila kangko. Hinonol la etaman ya in-utoh mo kanla. ⁷ Amêhén muwang lay na ya hika ya ubatan hên kaganawan ya dinyag haka hinabi ko. ⁸ Gawan ginilam la ya intoro kina kanla, ya namwangan ko kamo, haka taganán muwang la, ya hiko ay ubat kamo, haka ampaniwala hila, ya hika ya namiutoh kangko.

⁹ “Hila ya an-ihalangin ko. A ko an-ihalangin hilay a ampagpalokop kamo. Noa, an-ihalangin ko hilay impatsiwala mo kangko, ta kamo hila. ¹⁰ Ya hinoman ya atsi kangko, ay kamo, haka ya hinoman ya atsi kamo, ay kangko. Angkahêlék ya panga-Diyos ko gawan ha paniwala la kangko. ¹¹ Mag-alih kina di ha luta, ta mag-orong kina kamo. Noa, atsi hila pon di ha luta. Tatang koy banal, illagan mo hilay impatsiwala mo kangko ha kapangyarihan mo, ta êmén mag-in mimihay nakêm la, hên nanad nakêm mo haka nakêm ko, ya mimiha. ¹² Kaban kalamo la ko, di ha luta, ay inillagan ko hila gawan ha kapangyarihan mo, haka ayn kanla ya nidayo kangko, no alwan

bêngat hatoy miha ya manan tinalagá ya midayo ya, haka milako ha kaparusaan, ta êmén matupad ya nakahulat ha Kahulatan mo.* ¹³ Marani ya pamag-orong ko kamo. Kabay ipagilam ko kanla ya hatsi, ya an-ihalangin ko kamo, kaban atsi ko pon di ha luta, ta êmén hila magkamain hên hadyay kahiglaan, hên nanad ha kahiglaan ko. ¹⁴ Naidin kina kanla ya habi mo, bayo kinahêmékan hila hên a ampaniwala, ya hiko ay ubat kamo. Kinahêmékan hila, gawan ayn hilan pamakilamo kanlan a ampaniwala kangko, hên nanad kangko ya ayn pamakilamo kanlan a ampagpalokop kan Apo Namalyari. ¹⁵ A ko an-ihalangin ya alihên mo hila di ha luta, noa, an-ihalangin ko ya illagan mo hila kan Satanas. ¹⁶ Ayn hilan pamakilamo kanlan a ampaniwala kangko, hên nanad kangko ya ayn pamakilamo kanlan a ampagpalokop kan Apo Namalyari. ¹⁷ Ha pamanggilam lan habi mo ya kaptégan ay ipapawa mo hila hên manyag kalabayan mo. ¹⁸ No ay êmén ya pay-utoh mo kangko kanlan a ampaniwala kamo, êmén êt bayro ya pay-utoh ko kanla, ta êmén hila manoro kanlan a ampaniwala kamo. ¹⁹ An-itlagá koy sarili ko hên manyag kalabayan mo, ta êmén hila etaman ay mitalagá hên manyag kalabayan mo.

²⁰ “Alwan bêngat hilay habaytsi ya tagahonol ko ya an-ihalangin ko kamo, noa, hato êt ya maniwala kangko gawan ha an-itoro la. ²¹ Tatang, an-ihalangin ko hilangan ta êmén mag-in mimihay nakêm la, hên nanad ha nakêm mo haka nakêm

* ^{17:12} Awit 41:9.

ko ya mimiha. Atsi hila dayi kantamo hēn nanad atsi ka kangko, haka nanad atsi ko kamo, ta êmēn hilay tawo ha luta ay maniwala ya hika ya nay-utoh kangko. ²² No ay-êmēn mo kon dinyanan karangalan, ay êmbayro êt ya dinyanan ko hilan karangalan, ta êmēn mag-in mimihay nakêm la, hēn nanad ha nakêm mo haka nakêm ko ya mimihia. ²³ Hiko ay atsi kanla, haka hika ay atsi kangko, ta êmēn mag-in ayn pamagkulang ya pagmimiha la. Haka, ta êmēn mamwangan lan a ampaniwala kamo, ya hika ya nay-utoh kangko. Haka, ta êmēn la mamwangan ya anlugurên mo hila, ya nanad ha pamanlugud mo kangko.

²⁴ “Tatang ko, labay kon makalamo ko hilay impatsiwala mo kangko ha langit, ta êmēn la mahêlêk ya kapahilêw ya kahampatan hēn panga-Diyos ko, ya indin mo kangko gawan ha pamanlugud mo kangko paubat hēn a pon dinyag ya hata luta. ²⁵ O Tatang ko, ya makatoynungan, a la ka kilala lan a ampagpalokop kamo. Noa, hiko, ay kilala kata, haka habaytsi hilay tagahonol ko, ay muwang la, ya hika ya nay-utoh kangko. ²⁶ Impakilala kata kanla haka ihundo katan ipakilala kanla, ta êmēn hila milulugud, hēn nanad ha pamanlugud mo kangko ta êmēn hikoy magpaidi kanla.”

18

Ya pamandakêp kan Apo Jesus

(Mateo 26:47; Marcos 14:43-50; Lucas 22:47-53)

¹ Hēn naihalangin ni Apo Jesus ya habayto, ay nammita yay na hēn kalamo nay tagahonol na hēn palako ha lipay hēn hapa ya nag langan Cedron.

Bayro ha lipay, ya nilako lan Apo Jesus, ay malat ya intanêm ya poon olibo. ² Amêhên, hi Judas Iscariote, ya may-upit kan Apo Jesus, ay muwang na ya habaytoy legal, ya panay lan anlakwên lan Apo Jesus. ³ Bayro na hilan nilako ni Judas hên kalamo nay ungno kanlan ampagbantay ha Templo haka mihay pangkat hên hundaloh, ya impalako bayro hên ampamaala kanlan pari haka hilay Pariseo. Ampantan hila hên pag-atáng haka almas. ⁴ Gawan muwang na ngan ni Apo Jesus ya malyari kana ay tinupa na hila haka na hinabi kanla, ya wana, “Hinoy antapolên yo?”

⁵ Kabay wanla, “Antapolên naên hi Jesus, ya taga-Nazaret.” Bayo hinabi ni Apo Jesus, “Hikoy habayto.” Kalamo lan hundaloh hi Judas, ya nay-upit kan Apo Jesus. ⁶ Pamakahabi ni Apo Jesus ya hiyay habaytoy antapolên la, ay nipaorong hila haka hila nipatumba ha luta.

⁷ Kabay nangoman yan nangotang hi Apo Jesus, ya wana, “Hino ya antapolên yo?”

Hinabi la, ya wanla, “Hi Jesus ya taga-Nazaret.”

⁸ Amêhên, wani Apo Jesus, “Hinabi kina kamoyu, ya hiko yan makê. No hiko ya antapolên yo, ay paulayan yo hilay tagahonol ko.” ⁹ Hinabi nay habayto ta êmên matupad ya hinabi na, ya ayn miha man kanlan impatsiwala kana, ya midayo kana hên mipalako ha kaparusaan.

¹⁰ Biglan inanoh ni Simon Pedro ya êtak na, ta tsinigpah nay têkk* ni Malco, ya mihay ipoh hên pinakapoon pari. ¹¹ Wani Apo Jesus kan Pedro, “Igoma moy êtak mo, ta kailangan kon têêhên ya

* **18:10** Tsinigpah ya panabtab ya têkk ni Malco.

kairapan, ta habaytsi ay kalabayan ni Apo Namalyari, ya Tatang ko.”

Hi Apo Jesus ay in-arap kan Anas ya manan pinakapoon pari

¹² Dinakêp hi Apo Jesus, ta ginapoh ya gamêt na, hên hilay hundaloh hên kalamo lay kapitan la haka hilay Israelita ya tanod hên Templo. ¹³ Hiyay gintan pon kan Anas, ya ampo ni Caifas. Habaytsi hi Caifas ay pinakapoon pari hên panaon hên habayto. ¹⁴ Hi Caifas ya naghabi kanlan kapareho nan poon lan Israelita ha Templo, ya mangêd ay miha tana ya matsu para ha kal-atan.†

*Hinabi ni Pedro ya a na balay hi Apo Jesus
(Mateo 26:57-58, 69-75; Marcos 14:53-54, 66-72;
Lucas 22:55-57)*

¹⁵ Hi Simon Pedro, haka miha pon ya tagahonol ni Apo Jesus ay hinumonol kanlan Apo Jesus. Gawan kilala yan pinakapoon pari ya hatoy miha, ay nakahowên ya ha bakod hên lote hên pinakapoon pari hên kalamo lan Apo Jesus.

¹⁶ Nabalag hi Pedro ha danin kabat hên bakod. Immawah ya hatoy mihay tagahonol, ya kabalay hên pinakapoon pari, ta kinahabi nay babayi ya ampagbantay ha kabat hên bakod, haka na pinahowên hi Pedro. ¹⁷ Kinotang nan hatoy babayi kan Pedro, ya wana, “Miha ka ha tagahonol nan habaytoy dinakêp?” Kabay wani Pedro, “Alwa.”

¹⁸ Gawan nakêbêl hên habayto, namagkêt hên uling hilay ipoh, haka hilay tanod, bayo nanêngêy hila. Hi Pedro ay kalamo lan nakairêng hên ampanêngêy.

† **18:14** Juan 11:49-52.

*Hi Apo Jesus ay kinotang ni Anas
(Mateo 26:59-66; Marcos 14:55-64; Lucas 22:66-71)*

¹⁹ Hi Apo Jesus ay kinotang ni Anas, ya pasado ya pinakapoon pari, hēn tungkol ha tagahonol na, haka tungkol ha panoro na. ²⁰ Hinabi ni Apo Jesus, ya wana, “Hikoy nanoro ha arapan lan kal-atan. Hikoy panay hēn nanoro ha sinagoga haka ha Templo ya pagtsiponan hēn Israelita. Ayn akon hinabi hēn patago. ²¹ Pata hiko ya kotangēn mo? Ya kotangēn mo dayi ay hatoy nanggilam hēn habi ko, ta muwang la no hinoy hinabi ko kanla.” ²² Hēn pangahabi ni Apo Jesus hēn habayto, ay tsinampaling ya hēn hatoy mihay bantay ya atsi bayro, ya wana, “Pata êmbayro ya hinabi mo ha pinakapoon pari?” ²³ Wana etaman ni Apo Jesus, “No naghabi kon alwan mangêd, paptêgan mo. No mangêd ya hinabi ko, awta tsinampaling mo ko?” ²⁴ Amêhēn, hi Apo Jesus ay impagtan ni Anas kan Caifas, ya pinakapoon pari hēn habayto. Nakagapoh pon ya gamêt na.

*Hinabi nay nan oman ni Pedro ya a na muwang hi Apo Jesus
(Mateo 26:71-75; Marcos 14:69-72; Lucas 22:58-62)*

²⁵ Kaban atsi ya pon bayro hi Simon Pedro hēn ampanêngêy, ay kinotang la yan oman, ya wanla, “Alwan hika ya mihay tagahonol hēn tawoy hato?” Impuglaho ni Pedro, ya wana, “Alwa.” ²⁶ Atsi bayro ya mihay kamag-anak hēn ipoh ya tsinig-pahan ni Pedro hēn têkk. Miha ya etaman kan-lan ipoh hēn pinakapoon pari. Kinotang na kan Pedro, ya wana, “Alwan hika ya nahêlêk ko hēn

kalamo ni Jesus do ha mal-at ya poon olibo?” Hinabi ni Pedro, ya wana, “Alwa.”²⁷ Nahêñ minghan nay na êt impuglaoh ni Pedro, ya a na muwang hi Apo Jesus, ay nangkatsi ya mihay manok.

*Hi Apo Jesus ay in-arap kan Gobernador Pilato
(Mateo 27:1-2, 11-14; Marcos 15:1-5; Lucas 23:1-5)*

²⁸ Hêñ nayari lay nan kinotang hi Apo Jesus ha bali ni Caifas, ay gintan la yay na ha bali ni Gobernador Pilato, ya taga-Roma. Dali allo hêñ habayto. Hilay Israelita ay a hinumwêñ† ha bali na ta marani yanay Pistan Pangaligtas ha Egipto§ haka labay lan mangan ha pista.²⁹ Kabay immawah ya hi Gobernador Pilato ta kinotang na hila, no hinoy an-ibara la kan Apo Jesus.

³⁰ Hinabi lan Israelita, ya wanla, “No ayn ya dayin dinyag ya alwan mangêd, ay a naêñ ya gintan di kamo.”

³¹ Hinabi ni Gobernador Pilato kanla, ya wana, “Hikaw tana ya manatol kana hêñ pamanhumonol ha Kautuhan yo.”

Noa hinabi lan Israelita, ya wanla, “Ayn kay karapatan hêñ hatolan hêñ patsêñ ya hinoman.”

³² Nalyari ya habayto ta êmên matupad ya hinabi ni Apo Jesus no ay-êmên yan matsi.

† **18:28** Bawal kanlan Israelita hêñ humwêñ ha bali hêñ alwan Israelita. Haka bawal kanlan Israelita hêñ makipista no hinumwêñ hila ha balin alwan Israelita ta itad hilan narêmêk. § **18:28** Paskwa. Hêlkêñ ha panlêkan labay habiêñ hêñ habi di ha bokotan hêñ hata Bibliya.

³³ Hi Gobernador Pilato, ay nag-orong ha bali na, haka na impabaêg hi Apo Jesus, ta kinotang na ya, “Hika ya ari hên Israelita?”

³⁴ Hinabi ni Apo Jesus, ya wana, “Habain ay ubat ha sarili mon kaihipan, o main naghabin habain kamo?”

³⁵ Hinabi ni Gobernador Pilato, ya wana, “Yarin Israelita ko? Hilay kapareho mon Israelita, haka hilay ampamaala kanlan pari yo, ya nantan kamo di. Hino awud ya dinyag mo?”

³⁶ Hinabi ni Apo Jesus kana, “Ya pamanlokop ko ay alwan di ha luta. No di ha luta ya pamanlokop ko, ay impaglaban la ko dayi hên tagahuyo ko, ta êmên a la kon dakpêñ lan Israelita. Noa, alwan di ha luta ya pamanlokop ko.”

³⁷ Amêhén, nangotang hi Gobernador Pilato, ya wana, “No êmbayro, ay ari ka?”

Bayo hinabi ni Apo Jesus, ya wana, “Hika ya naghabi hên hikoy mihay ari. In-anak ako di ha luta ta êmên mamipamwang hên kaptêgan. Hilay mabay hên mamwangan ya kaptêgan, ay ampang-gilam hên anhabiên ko.”

³⁸ Kabay wani Gobernador Pilato, “Hino awud ya kaptêgan?”

*Hi Apo Jesus ay hinatolan hên matsi ha koros
(Mateo 27:15-31; Marcos 15:6-20; Lucas 23:13-25)*

Pangahabi na ay nangoman yan immawah hi Gobernador Pilato, ta hinabi na kanlan Israelita, ya wana, “Ayn akon angkahêlêk ya ikadikil kana.

³⁹ Main kaw hên kaugalian, ha balang Pistan Pangaligtas, ya kailangan kon ibuhan ya mihay nakahukul. Labay yon ibuhan ko hi Jesus, ya Ari

yon Israelita?” ⁴⁰ Noa, naubuh hilan nan-angaw, ya wanla, “Alwan habain. Hi Barrabas tana ya ibuhan.” (Hi Barrabas ay mihay nanalanghang ha gobyerno.)

19

¹ Gawan ha kalabaylan ampamaala ha Templo, ay impalatiko ni Gobernador Pilato hi Apo Jesus. ² Ha pammusmus lan hundaloh kana, ay nangwa hilan nanad tanyuong ya pinanyag la yan korona, ya impakopya la ha ulo na. Haka la ya pinatakopian hēn mahampat ya takop, ya kulay ubi, ya nanad ha takop lan ari. ³ Bayo miha-miha hilan dinumani kana, ta wanla kana, “Kumara dayi ya biyay hēn Ari lan Israelita!” Haka la ya pinagtatampaling.

⁴ Immawah oman hi Gobernador Pilato, ta hinabi na kanla, iarap ko ya kamoyu ta êmênyo mamwangan ya ayn akon nahélék ya kasalanan na. ⁵ In-awah la hi Apo Jesus ya pinakopyaan lan korona ya dyag ha diwi, haka pinatakopian hēn kulay ubi. Bayo hinabi kanla ni Gobernador Pilato, ya wana, “Hêlkên yoy habaytsi.” ⁶ Hêñ nahélék lay na hi Apo Jesus hēñ poon pari, haka hēñ hilay bantay ha Templo, ay in-angaw la, ya wanla, “Ipako ya ha koros! Ipako ya ha koros!” Noa, hinabi kanla ni Gobernador Pilato, ya wana, “Hikaw tana ya maypako kana ta ayn akon nahélék ya dinyag nay kasalanan.” ⁷ Naghabi hilay Israelita, ya wanla, “Main kay hēñ anhonolén ya utoh ya hêpat yan patsén, ta hinabi na, ya hiya kanoy Anak ni Apo Namalyari.”

⁸ Nahêñ nagilam ni Gobernador Pilato ya hata hinabi la, lalo yay nan nalinwan. ⁹ Nangoman yan hinumwên ha lalêñ bali na ta kinotang na hi Apo Jesus, ya wana, “Taga-ayri ka?” Noa, a ya naghabi hi Apo Jesus. ¹⁰ Kinotang na yay na êt, ya wana, “Pata a mo labay maghabi kangko? A mo muwang ya main akon kapangyarihan hêñ ipabuhan kata, o ipapako ka ha koros?” ¹¹ Bayo naghabi hi Apo Jesus, ya wana, “Madyag moy habain, ta dinyanan na kan tungkulan ni Apo Namalyari. Kabay mabyat ya kasalanan lan nantan kangko di kanan kasalanan mo.” ¹² Nahêñ nagilam ni Gobernador Pilato ya hinabi ni Apo Jesus, ay labay na ya dayi hêñ ibuhan, noa, nan-angaw hilay Israelita, ya wanla, “No ibuhan moy habain, alwa kan kaluguran nan Emperador, ya poon mo ha Roma. Ta no hinoman ya ampaghabin hiya ay mihay ari, ay kapatsi nan Emperador.” ¹³ Hêñ nagilam ni Gobernador Pilato ya pangahabin êmbayro, ay in-awah na hi Apo Jesus, haka ya nikno ha iknoan hêñ panlingonan hêñ kaso, ha logal ya nag langan Gabata ha habin Hebreo, ya main intabladoy bato.

¹⁴ Allo hêñ habayto hêñ pamaglêan ha Pistan Pangaligtas. Maranin ugto hêñ hinabi ni Gobernador Pilato kanlan Israelita, ya wana, “Hatsi yay na ya ari yo.” ¹⁵ Nan-angaw hila, ya wanla, “Patsêñ ya! Patsêñ ya! Ipako ya ha koros!” Amêhêñ, wani Gobernador Pilato, ya wana, “Labay yo yan ipako ha koros, ya ari yo?” Amêhêñ, naghabi hilay ampamaala kanlan pari ya wanla, “Ayn kay hêñ kaatag ya ari no alwan ya Emperador.” ¹⁶ Kabay

indin ni Gobernador Pilato hi Apo Jesus kanla ta êmén la ya ipapako ha koros.

*Hi Apo Jesus ay impako ha koros
(Mateo 27:32-44; Marcos 15:21-32; Lucas 23:26-43)*

Kingwa la hi Apo Jesus, ¹⁷ ta impabalangaw kana ya mihay koros hên palako ha lugal ya ambaêgên hên Bungo (Golgota ha habin Hebreo, ya habi lan Israelita). ¹⁸ Panlumatêng la bayro, ay impako la hi Apo Jesus ha koros ha pibonakan hên loway nakapako êt ha koros la. Ya miha ay atsi ha koros ha dapit panabtab ni Apo Jesus, haka ya miha ay atsi ha koros ha dapit uki ni Apo Jesus. ¹⁹ Nanulat hi Gobernador Pilato. Ya wanana hulat, “Hi Jesus, ya taga-Nazaret, ya Ari lan Israelita.” Bayo la indin ya hata hulat ha koros, ha ugton ulo ni Apo Jesus. ²⁰ Inhulat nay habayto ha habin Hebreo, Latin, haka Griego. Mal-at kanlan Israelita ya namahan habayto, ta narani ya ha balayan, ya pinaypakoan kan Apo Jesus. ²¹ Kabay hinabi lan ampamaala kanlan pari lan Israelita kan Gobernador Pilato, ya wanla, “Paan mon ihulat ‘ya Ari hên Israelita,’ noa, ya ihulat mo dayi ay, ‘Hinabin hatsi, ya hiya ya Ari lan Israelita.’” ²² Hinabi ni Gobernador Pilato, ya wana, “Ya naihulat ko, ay naihulat kina.”

²³ Hêñ naipako lay na hêñ hundaloh hi Apo Jesus, ay kingwa la ya takop na, bayo piniaatagan lan apat. Haka la êt kingwa ya hatoy pangkêbêl na ya ayn tayi. ²⁴ Pinihahabian lan hundaloh, ya wanla, “Paan tamon pigi-gihian ya hatsi, ta mahayang tamo. Mahampat, ay magpalabonutan kitamo no hinoy makapiuli.” Nalyari ya habayto,

ta êmén matupad ya nakahulat ha Kahulatan ni Apo Namalyari, ya wana,
“Pini-aatagan la ya takop ko, bayo hatoy pangkêbêl ko ay pinagpalabonutan la.”*
Ta êmbayro ya dinyag lan hundaloh.

²⁵ Ha danin koros ha pinaypakoan kan Apo Jesus, ay nakairêng ya indo na, bayo mihay babayi ya kapotoh pohêl hên indo na, haka hi Maria Magdalena haka hi Maria, ya ahawa ni Cleopas. ²⁶ Hêñ nahêlêk ni Apo Jesus ya indo na, haka hatoy banhagan lan anlugurêñ nan tagahonol na, ya atsi ha dani na, ay hinabi na, ya wana, “Indo, atsi ya anak mo.” ²⁷ Hinabi na êt ha tagahonol na, ya wana, “Atsi di ya indo mo.” Kabay paubat hêñ habayto, ay pinagkalamo na ya indo ni Apo Jesus ha bali na.

Ya pangamatsi ni Apo Jesus

(Mateo 27:45-56; Marcos 15:33-41; Lucas 44-49)

²⁸ Muwang ni Apo Jesus ya nayari ya kaganawan ya impadyag kana ni Apo Namalyari. Haka ta êmén matupad ya atsi ha Kahulatan na, ay hinabi na, “Angkaangan ako.” ²⁹ Atsi bayro ha nanad kolo, ya main nangihoy ya alak. In-iptêh la ya nanad bolak ha makarang ya hanga hêñ isopo. Bayo indêrê la ha nangihoy alak, ya atsi ha nanad kolo, ta intag-ay la ha bêbêy ni Apo Jesus ta êmén na halêphêpêñ. ³⁰ Hêñ hinalêphêpêñ nay na ni Apo Jesus ya nangihoy alak, ay hinabi na, ya wana, “Nayari yana.” Nagkulaêy ya ulo na hêñ natsi yay na.

Nilatog hêñ hundaloh ya lawini ni Apo Jesus

* **19:24** Awit 22:18.

³¹ Allon pamaglêan la ha pamagsimba haka pista la hên habayto. Nilako la hên Israelita hi Gobernador Pilato, ta a la labay ilaêh ha koros ya natsi no allon pamagsimba. Haka maalagá kanla ya habaytoy allon pamagsimba ta napitagon pista ya êt, kabay pinakihabi la kan Gobernador Pilato, ya ipapakli ya but-on ahêl hên nakapako ha koros ta alihêh bayro ya bangkay la. ³² Kabay nilako lay na êt hên hundaloh hên pinakli ya but-on ahêl lan loway nakapako hên kalamo ni Apo Jesus. ³³ Hêh lumatêng hila kan Apo Jesus, ay nahêlêk la, ya mana yay nan natsi. Kabay a lay na pinakli ya but-on ahêl na. ³⁴ Noa, nilatog hên mihay hundaloh ya lawini ni Apo Jesus ha aypaan tagyang, bayo biglan namoganggang ya daya haka lanêm. ³⁵ Habaytoy nalyari, ay pêtêg, ta ya nakahêlêk hên nalyari, ay mapaypaniwal-an. Kabay an-ipamwang na ya kaganawan ya nahêlêk na, ta êmén hikaw man, ay maniwala. ³⁶ Nalyari ya habayto, ta êmén matupad ya Kahulatan ni Apo Namalyari, ya ayn mapakli ya miha man ha but-o na.† ³⁷ Haka main êt kaatag ya nakahulat ha Kahulatan ni Apo Namalyari, ya wanana Kahulatan, “Pakahêlkên lay hatoy nilatog la.”‡

Ya pamilbêng kan Apo Jesus

(Mateo 27:57-61; Marcos 15:42-47; Lucas 23:50-56)

³⁸ Hêh nayari ya habayto, ay pinakihabi ni Jose ya taga-balayan Arimatea, kan Gobernador Pilato, ya paulayan yan may-ilbêng bangkay ni Apo

† 19:36 Awit 34:20; Bilang 9:12; Exodo 12:43-46. ‡ 19:37
Zacarias 12:10.

Jesus. Hatsu hi Jose, ay mihay ampaniwala kan Apo Jesus, noa, a na impamwang ya paniwala na, gawan malimo ya kanlan poon lan Israelita. Pinaulayan ya etaman ni Gobernador Pilato. Kabay kingwa ni Jose ya bangkay ni Apo Jesus.³⁹ Kalamo ni Jose hi Nicodemo, ya dinumani kan Apo Jesus hēn haton mihay yabi. Nantan yan tatlumpo ya kilo hēn pabango, ya piniagêm hēn mira haka aloe.⁴⁰ Kingwa lay bangkay ni Apo Jesus, ta dinyanan lan pabango kaban kinêlkêlan la ya hēn takop, ya naputsi gawan ha kaugalian lan Israelita no main iilbêng.⁴¹ Ha dani hēn pinaypakoan kan Apo Jesus, ay main pananêman. Bayro ha pananêman, ay main pay-ilbêngan ya nanad lêyang ya bayon dyag, ya a êt pinay-ilbêngan.⁴² Indin lay bangkay ni Apo Jesus bayro, gawan narani, haka gawan kailangan yan iilbêng, bayo matatay allo, gawan habaytoy bisperas hēn pista, haka bisperas allon pamagsimba la.

20

*Hi Apo Jesus ay nabiay oman
(Mateo 28:1; Marcos 16:1-8; Lucas 24:1-12)*

¹ Naririglêm pon hēn allon Dominggo, ay nilumatêng hilan Maria Magdalena ha pinay-ilbêngan kan Apo Jesus. Nahêlêk la ya natulid ya hadyay hêlay bato, ya intakap ha bêbêy hēn pinay-ilbêngan.² Gawan ha nahêlêk la, ay nuwayu hilan nagtagloh kan Simon Pedro, haka kanan tagahonol, ya banhagan lan anlugurên ni Apo Jesus. Hinabi la kanla, “Kingwa la ya bangkay hēn Panginoon ha pinay-ilbêngan kana. Haka a

naêñ muwang no ay-iri la yan gintan.” ³ Kabay hi Pedro, haka hatoy tagahonol ya banhagan lan anlugarêñ ni Apo Jesus, ay nagtagloh bayro ha pinay-ilbêngan. ⁴ Niagnan hilan nuwayu, noa, hi Pedro ay naunaan yan hatoy mihay tagahonol ha pinay-ilbêngan. ⁵ Napaiyoko ya, ta hinilip na ya lalêñ lêyang. Nahêlêk na ya hatoy pinamunggoh ha bangkay ni Apo Jesus, noa, a ya pon hinumwêñ. ⁶ Hêñ nilumatêng ya hi Pedro, ay tinumagloh yan hinumwêñ ha lalêñ lêyang. Nahêlêk na etaman, ya atsi ya awud bayro ya pinamunggoh ha bangkay ni Apo Jesus. ⁷ Main êt bayro, hêñ nakapapawa, ya nanad mahlay ya panyo, ya pinangêlkêl ha ulo hêñ bangkay ni Apo Jesus. ⁸ Amêhêñ, hinumwêñ yay na etaman ya hatoy tagahonol ya nunan nilumatêng bayro. Nahêlêk na êt ya habayto, kabay naniwala yay na, ya nabiay yan oman hi Apo Jesus. ⁹ Agyan impahulat ni Apo Namalyari ha Kahulatan na, ya kailangan mangoman mabiyay hi Apo Jesus, ay a la êt naintindihan ya habayto. ¹⁰ Amêhêñ, nuli hilay nay loway tagahonol ni Apo Jesus ha bali la.

*Nagpahlêk hi Apo Jesus kan Maria Magdalena
(Mateo 28:9-10; Marcos 16:9-11)*

¹¹ Nakabita hilay nay loway tagahonol ni Apo Jesus hêñ nilumatêng bayro hi Maria Magdalena ha pinay-ilbêngan kan Apo Jesus. Nakairêng ya bayro ha bêbêy hêñ lêyang hêñ ampanangih. Kaban ampanangih ya, ay hinilip nay lalêñ lêyang. ¹² Nahêlêk na bayro ya loway anghel ya nakatakop hêñ naputsi ya nakaikno ha ubatan hêñ bangkay ni Apo Jesus, miha ha dapit ulo haka miha ha dapit

bitsih. ¹³ Kinotang la hi Maria, “Pata ampanangih ka?”

Hinabi na, ya wana, “Kingwa la ya bangkay hēn Panginoon ko, haka a ko muwang no ay-iri la yan gintan.”

¹⁴ Hēn namalingay hi Maria hēn nahabi nay habayto, ay nahēlēk na hi Apo Jesus ya nakairēng bayro, noa, a na ya nabalayan. ¹⁵ Kinotang ya ni Apo Jesus, ya wana, “Pata ampanangih ka? Hinoy antapolēn mo?” Èndat ni Maria hēn hiya ya manayhay hēn tanaman bayro. Kabay kinotang na, ya wana, “Apo, no hika ya nangwa kana, itoro mo kangko no ay-iri mo yan gintan ta kowēn ko ya.” ¹⁶ Amêhēn, wani Apo Jesus kana, “Maria.” Inumarap hi Maria kan Apo Jesus, ta wana, “Raboni.” (Ya labay habiēn hēn “Raboni” ay “Mánoro” ha habin Hebreo ya habi lan Israelita.) ¹⁷ Hinabi ni Apo Jesus kana, ya wana, “Paan mo kon talanēn ta a ko êt nakaorong kanan Tatang. Lakwēn mo hilay patēl ko ta habiēn mo kanla ya mag-orong kina kanan Tatang ko, ya Tatang yo etaman, kan Apo Namalyari, ya Diyos ko haka Diyos yo.” ¹⁸ Kabay nagtagloh yay na hi Maria Magdalena kanlan tagahonol na, ta wana, “Nabiyay yan oman ya Panginoon! Nahēlēk ko ya!” Bayo hinabi na êt ya impahabi na kana ni Apo Jesus.

*Nagpahlēk ya hi Apo Jesus kanlan tagahonol na
(Mateo 28:16-20; Marcos 16:14-18; Lucas 24:36-49)*

¹⁹ Hēn yabi yana hēn habayton allon Dominggo, ay naka-tsipon hilay tagahonol na. Impakakabat lay bali ta angkalimo hila ha poon lan Israelita.

Namakonkaynaman ay nirêng ya hi Apo Jesus ha bonak la. Hinabi na, “Patêkbékên ni Apo Namalyari ya nakêm yo.” ²⁰ Pangahabi nan habayto, ay impahlêk na kanla ya hugat ha gamêt na, haka ha aypañ tagyang na. Nabalayan la yay na bayto, kabay hadyay kahiglaan lan tagahonol na. ²¹ Hinabi nay na êt ni Apo Jesus kanla, “Magkamain kaw hên kapatêkbékan nakêm. No ay-êmén na kon in-utoh ni Apo Namalyari, ya Tatang ko, ay êmén êt bayro hên an-iutoh kataw.” ²² Pangayari nan naghabi ay pinahlépan na hila haka na hinabi, “Tanggapén yoy Espiritu ni Apo Namalyari. ²³ Hiyay mamitoro kamoyu, ta no habiên yo ya main tawo ya pinatawad ha kasalanan la, ay taganán pinatawad hila ni Apo Namalyari. Haka no habiên yo ya a hila pinatawad ha kasalanan la, ay a hila taganán pinatawad ni Apo Namalyari ha kasalanan la.”

Hi Tomas ay a naniwala ha hinabi kana ya nangoman nabiyay hi Apo Jesus

²⁴ Hi Tomas, ya miha kanlan labinlowa, ya ambanhagan Kambal, ay ayn bayro hên nagpahlêk hi Apo Jesus kanlan tagahonol na. ²⁵ Kabay hinabi kana hên kaatag ya tagahonol, ya wanla, “Nabiyay yan oman ya Panginoon. Nahêlêk naên ya.” Noa, hinabi ni Tomas, ya wana, “A ko maniwala ya nabiyay yan oman, angga ha a ko pon mahêlêk ya ubatan hên pako ha gamêt na, haka no a ko pon magap-an ya hugat ha aypañ tagyang na.”

²⁶ Hêñ mayari ya waloy allo, nangoman hilan nitsi-tsipon ha bali, ya hilay tagahonol na. Kalamo la hi Tomas. Naubuh hêñ nakakabat ya ilwangan,

noa, nakahowêñ ya hi Apo Jesus, biha nirêng ya ha bonak la. Hinabi nay na êt, ya wana, “Magkamain kaw hên kapatêkbêkan nakêm.” ²⁷ Bayo hinabi na kan Tomas, “Pakahêlkên mo, haka gap-an moy hugat ha gamêt ko haka ha aypan tagyang ko. Paan kan mag-alangan. Maniwala kay na.” ²⁸ Hinabi ni Tomas, ya wana, “Panginoon ko, hika awud hi Apo Namalyari.” ²⁹ Amêhêñ, hinabi kana ni Apo Jesus, ya wana, “Ampaniwala kay na, gawan ha nahêlêk mo kina? Lalo hilan an-ingalwan ya ampaniwala kangko, agyan a la ko angkahêlêk.”

No awta hinulat ya hata libro

³⁰ Bapan lakê pon ya kapapaêpapah ya dinyag ni Apo Jesus ya nahêlêk lan tagahonol na. Noa, a nai-hulat bayri ha libro. ³¹ Ya naihulat di ay inhulat, ta êmêñ kaw maniwala ya hi Apo Jesus ay Anak ni Apo Namalyari, ya Mesias, ya Cristo, ya Mámilitgas ya pinili nan mamaala. Ta no maniwala kaw, ay madyanan kaw hên biyay ya ayn angga, gawan ha pakikimiha yo kan Apo Jesus.

21

Nagpahêlêk ya hi Apo Jesus ha pito kanlan tagahonol na

¹ Hêñ nayari ya habayto, ay nagpahlêk yay na êt hi Apo Jesus kanlan tagahonol na. Êmêñ di ya pangapalyari ha Dagat-dagatan hên Tiberias. ² Mikakalamo hilan Simon Pedro, hi Tomas ya banhagan lan Kambal, hi Natanael ya taga-Cana, ha probinsyan Galilea, ya loway anak ni Zebedeo, haka ya lowa pon êt ya tagahonol ni Apo Jesus.

³ Hinabi kanla ni Simon Pedro, ya wana, “Manolapêt ako.” Hinabi lan kaatag, ya wanla, “Kilako kay kamo.” Amêhên, ay nammita hilay na hêñ hinumakay ha bangka, noa, ayn hilan nakwa hêñ yabin habayto.

⁴ Hêñ dali allo, ay nakairêng hi Apo Jesus ha laylay lanêm, noa, a la ya nabalayan hêñ tagahonol na. ⁵ Kinotang na hila, “Maanak ko, main kaw hêñ nakwa?” Kabay wanla, “Ayn kay nakwa.”

⁶ Wanay na êt ni Apo Jesus kanla, ya wana, “Itata yo ha dapit panabtab hêñ bangka ya lambat yo ta êmêñ kaw makakwa.” Kabay intata la ya lambat la, haka hêñ habayto êt, ay a lay na maguloy-guloy ya lambat la ha kal-atan hêñ nakwa la. ⁷ Amêhên, hinabi na kan Pedro hêñ hatoy mihay tagahonol, ya banhagan lan anlugarên ni Apo Jesus, ya wana, “Hi Panginoon ya awud ya habayto!” Hêñ nag-ilam ni Simon Pedro ya hinabi kana, ay nagbaro ya, ta a ya nakabaro. Hêñ nakabaro yay na, ay naglukho yay na ha lanêm ta nanawonghong ya hêñ lakwêñ kumustaêñ hi Apo Jesus. ⁸ Ya kaatag ya tagahonol, ay nagbangkan palako ha laylay hêñ ampigu-guluyan ya lambat ya napno hêñ kênan lanêm. A hila marayo ha laylay lanêm ta siyamapo ya metros tana.

⁹ Hêñ nakalatêng hilay na ha laylay lanêm ay nakahêlêk hila hêñ apoy, ya main in-iyaw ya kênan lanêm haka puto. ¹⁰ Amêhên, wani Apo Jesus kanla, “Mantan kaw di hêñ kêna ya nakwa yo.”

¹¹ Hi Simon Pedro ay hinumakay ha bangka ta hinawpan na hilay kalamo na hêñ mangguloy hêñ lambat, ya napno hêñ mangahlay ya kêna ya main bilang hêñ magatoh boy limampo boy tatlo. A ya

nagihi ya lambat agyan êmbayroy kal-atan kêna. ¹² Wani Apo Jesus kanla, “Kaw di, ta mangan kitamo.” Miha man kanla, ay ayn naghêkaw nakêm hên mangotâng kana no hino ya, ta muwang la ya hiya ya Panginoon. ¹³ Amêhêñ, kingwa ni Apo Jesus ya puto, haka kênan lanêm ta indin na kanla. ¹⁴ Habaytoy katatlo nan pagpahlêk ni Apo Jesus kanlan tagahonol na paubat hên nabiyay yan oman.

Ya hinabi ni Apo Jesus kan Pedro

¹⁵ Hêñ nayari hilan nangan, ay kinotang ni Apo Jesus hi Simon Pedro, ya wana, “Simon, anak ni Juan, anlugurêñ mo kon igit kanlan habaytsi ya kaatag ya tagahonol ko?” Kabay wani Pedro, “Awo, Panginoon. Muwang mo ya anlugurêñ kata.” Amêhêñ, wani Apo Jesus, “Hayhayêñ mo hilay bayon ampaniwala kangko, ya maialimbawa ha biseron tupa.” ¹⁶ Amêhêñ, katalwa nay na êt kinotang ni Apo Jesus hi Pedro, “Simon, anak ni Juan, anlugurêñ mo ko?” Bayo wani Pedro, “Awo, Panginoon. Muwang mo ya anlugurêñ kata.” Amêhêñ, wani Apo Jesus, “Hayhayêñ mo hilay ampaniwala kangko, ya maialimbawa ha tupa.” ¹⁷ Ikatlo yan kinotang ni Apo Jesus, ya wana, “Simon, anak ni Juan, anlugurêñ mo ko?” Amêhêñ, hinumakit ya nakêm ni Pedro ha katatlo yan kinotang. Hinabi na, ya wana, “Panginoon, muwang moy balang hino. Muwang mo ya anlugurêñ kata.” Amêhêñ, hinabi kana ni Apo Jesus, ya wana, “Hayhayêñ mo hilay ampaniwala kangko, ya maialimbawa ha tupa.” ¹⁸ Anhabien ko kamo ya kaptêgan. Hêñ alwa ka pon mantêg toa,

ay ampabaroan moy sarili mo, haka anlakwên moy labay mon lakwên. Noa, pantumoa mon pêtêg, ay ipaktang moy gamêt mo ta kaatag ya mamikêlêkêl kamo, haka la ka gêtan do ha a mo labay lakwên.” ¹⁹ Hinabi kana ni Apo Jesus ya habayto, ta êmên mamwangan no ay-êmên yan matsi hi Pedro, ta êmên madyanan pamagpuri hi Apo Namalyari. Amêhêñ, hinabi ni Apo Jesus kana, ya wana, “Ihundo moy pamakihonol mo kangko.”

Hi Juan ya mihay tagahonol ya banhagan lan anlugurên ni Apo Jesus

²⁰ Namalingay hi Pedro, haka na nahêlêk ya anhumonol kanla hi Juan, ya hatoy tagahonol ya banhagan lan anlugurên ni Apo Jesus. Hatoy namidanin ulo ha pagaw ni Apo Jesus hêñ nan-gotang, “Panginoon, hinoy may-upit kamo?” hêñ nangan hilay na hêñ haton yabi hêñ dinakêp la hi Apo Jesus. ²¹ Hêñ nahêlêk ya ni Pedro, kinotang na kan Apo Jesus, ya wana, “Panginoon, hino etaman ya malyari di ha tawoy hatsi? Ay-êmên yan matsi?” ²² Hinabi ni Apo Jesus ya wana, “No labay kon mabiyay yan angga ha pag-orong ko, ay ayn kay nan pakiêmên bayro. Ya daygên mo, ay humonol ka kangko.” ²³ Gawan ha hinabi nay habayto, ay nibahwag kanlan ampaniwala kan Apo Jesus ya balita ya a ya matsi ya tagahonol ya hatsi. Noa, a na hinabi ni Apo Jesus, ya a ya matsi. Ta, ya hinabi na ay, “No labay kon mabiyay yan angga ha pag-orong ko, ay ayn kay nan pakiêmên bayro.” ²⁴ Habaytsi ya tagahonol ya banhagan lan anlugurên ni Apo Jesus, hiya ya ampamaptêg

ha balang nakahulat di. Hiya êt ya nanulat hêñ kaganawan hêñ habaytsi, haka muwang naêñ ya pamaptêg na ay kaptégan.

Ya tawlin inhulat ni Juan, ya tagahonol, ya am-banhagan lan anlugurêñ ni Apo Jesus

²⁵ Mal-at pon ya dinyag ni Apo Jesus. No ihulat ya kaganawan ya habayto, ay kayno a mihukad di ha luta ya kal-atan kahulatan ya maihulat.

Ya habi ni apo namalyari: Bayon tsipan - Ayta Mag-antsi New Testament in Ayta, Mag-antsi

copyright © 2006 Wycliffe Bible Translators, Inc.

Language: Mag-antsi Ayta (Ayta, Mag-antsi)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789718260654

The New Testament

in Ayta, Mag-antsi

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

civ

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 11 Nov 2022 from source files
dated 29 Jan 2022

d2289d90-e8af-5f04-a1e1-312fd0921aff